

ओं नमः परमात्मने, श्री महागणपतये नमः,
श्री गुरुभ्यो नमः, हरिः ओं

कृष्ण यजुर्वेदीय तैत्तिरीय संहिता पद पाठः (वाक्य सहित)

चतुर्थकाण्डे प्रथमः प्रश्नः

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in

Version Notes:

This is now the current Version 2.0 dated June 30, 2024.

1. This replaces the earlier version 1.1 dated June 30, 2022.
2. This version has been updated with the errors found and reported till June15, 2024.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id "vedavms@gmail.com"

Earlier Versions

1st	Version Number	0.0 dated 31st January 2019
2nd	Version Number	0.0 dated 31st August 2019
3rd	Version Number	1.0 dated 31st December 2020
4th	Version Number	1.1 dated 30th June 2022

Table of Contents

4	कृष्ण यजुर्वेदीय तैत्तिरीय संहितायां पद पाठे चतुर्थ काण्डं	4
4.1	चतुर्थकाण्डे प्रथमः प्रश्नः- अग्निचित्यङ्ग मन्त्रपाठाभिधानं.....	4

पद पाठे (वाक्य सहित) – चतुर्थकाण्डे – प्रथमः प्रश्नः

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

4 कृष्ण यजुर्वेदीय तैत्तिरीय संहितायां पद पाठे चतुर्थं

काण्डं

4.1 चतुर्थकाण्डे प्रथमः प्रश्नः– अग्निचित्यङ्ग मन्त्रपाठाभिधानं

TS 4.1.1.1

यु॒ञ्जानः॑ प्र॒थमं॑ मन॒स्तत्वा॑य स॒विता॑ धि॒यः ।

अ॒ग्निं ज्योति॑र्नि॒चाय्य॑ पृथि॒व्या अ॒द्ध्या ऽभ॑रत् ॥

यु॒क्त्वाय॑ मन॒सा दे॒वान्त् सु॒वर्य॑तो धि॒या दि॑वं ।

बृ॒हज्ज्योतिः॑ क॒रिष्य॑तः स॒विता॑ प्र सु॒वाति॑ तान् ॥

यु॒क्तेन॑ मन॒सा व॒यं दे॒वस्य॑ स॒वितुः॑ स॒वे ।

सु॒वर्गेया॑य श॒क्त्यै ॥

यु॒ञ्जते॑ मन॒ उ॒त यु॒ञ्जते॑ धि॒यो वि॒प्रा वि॒प्रस्य॑ बृ॒हतो॑ वि॒पश्चितः॑ ।

वि हो॒त्रा द॒धे व॒युना॒विदे॒क इन् – [] 1

TS 4.1.1.1 - Padam

यु॒ञ्जानः॑ । प्र॒थम॑म् । मनः॑ । त॒त्वाय॑ । स॒विता॑ । धि॒यः॑ ॥ अ॒ग्नि॒म् ।
ज्योतिः॑ । नि॒चाय्ये॑ति नि – चा॒य्य । पृ॒थि॒व्याः॑ । अधि॑ । ए॒ति ।
अ॒भर॑त् ॥ यु॒क्त्वाय॑ । मन॑सा । दे॒वान् । सु॒वः॑ । य॒तः॑ । धि॒या ।
दि॒वम् ॥ बृ॒हत् । ज्योतिः॑ । क॒रिष्य॑तः । स॒विता॑ । प्रेति॑ । सु॒वा॒ति ।
ता॒न् ॥ यु॒क्तेन॑ । मन॑सा । व॒यम् । दे॒वस्य॑ । स॒वि॒तुः॑ । स॒वे ॥
सु॒वर्गे॒याये॑ति सु॒वः – गे॒याय॑ । श॒क्त्यै॑ ॥ यु॒ञ्जते॑ । मनः॑ । उ॒त ।
यु॒ञ्जते॑ । धि॒यः॑ । वि॒प्राः॑ । वि॒प्रस्य॑ । बृ॒हतः॑ । वि॒पश्चितः॑ ॥ वी॒ति ।
हो॒त्राः॑ । द॒धे । व॒युना॑वि॒दिति॑ व॒युन – वि॒त् । ए॒कः॑ । इ॒त् । 1 (50)

TS 4.1.1.2

म॒ही दे॒वस्य॑ स॒वि॒तुः॑ परि॒ष्टुतिः॑ ॥
यु॒जे वां॑ ब्र॒ह्म पू॒र्व्यं नमो॑भि॒र्वि श्लो॒का य॑न्ति प॒थ्ये॒व सू॒राः॑ ।
शृ॒ण्वन्ति॑ वि॒श्वे अ॒मृत॑स्य पु॒त्रा आ ये॑ धा॒मानि॑ दि॒व्यानि॑ त॒स्थुः॑ ॥
यस्य॑ प्र॒याण॑म॒न्वन्य॑ इ॒द्युर्दे॒वा दे॒वस्य॑ म॒हि॒मान॑म॒र्चतः॑ ।

यः पार्थि॑वानि वि॒ममे स ए॒तशो र॒जाँ॑सि दे॒वः स॒वि॒ता म॒हि॒त्व॒ना ॥
दे॒व स॒वि॒तः प्र सु॒व य॒ज्ञं प्र सु॒व – [] 2

TS 4.1.1.2 - Padam

म॒ही । दे॒वस्य॑ । स॒वि॒तुः । परि॑ष्टुतिरिति परि॑-स्तुतिः ॥ यु॒जे । वा॒म् ।
ब्र॒ह्म । पू॒र्व्यम् । नमो॑भिरिति नमः॑ – भिः । वी॒ति । श्लो॒काः ॥
य॒न्ति । प॒थ्या ॥ इ॒व । सू॒राः ॥ शृ॒ण्वन्ति॑ । वि॒श्वे ॥ अ॒मृत॑स्य । पु॒त्राः ।
ए॒ति । ये । धा॒मानि॑ । दि॒व्यानि॑ । त॒स्थुः ॥ यस्य॑ । प्र॒याण॑मिति
प्र – या॒नम् । अ॒न्विति॑ । अ॒न्ये । इ॒त् । य॒युः । दे॒वाः । दे॒वस्य॑ ।
म॒हि॒मा॒नम् ॥ अ॒र्चतः॑ ॥ यः । पार्थि॑वानि । वि॒मम॑ इति वि – ममे ।
सः । ए॒तशः॑ । र॒जाँ॑सि । दे॒वः । स॒वि॒ता । म॒हि॒त्व॒नेति॑ म॒हि॒त्व॒ना ॥
दे॒व । स॒वि॒तः । प्रेति॑ । सु॒व । य॒ज्ञम् । प्रेति॑ । सु॒व । 2 (50)

TS 4.1.1.3

य॒ज्ञप॑तिं भ॒गाय॑ दि॒व्यो ग॒न्धर्वः॑ ।
के॒तपूः॑ के॒तन्नः॑ पु॒नातु॑ वा॒चस्प॑तिर्वाच॑म॒द्य स्व॑दाति नः ॥
इ॒मं नो॑ दे॒व स॒वि॒तर्य॑ज्ञं प्र सु॒व दे॒वायु॑वँ स॒खिवि॑दँ स॒त्राजि॑तं
ध॒नजि॑तँ सु॒वर्जि॑तं ॥

ऋ॒चा स्तो॒मꣳ सम॑र्द्धय॒ गाय॑त्रेण॒ रथ॑न्तरं ।

बृ॒हद्-गा॑यत्र॒वर्त॑नि ॥

दे॒वस्य॑ त्वा स॒वितुः॑ प्र॒सवे॑ ऽश्वि॒नोर्बा॒हुभ्यां॑ पू॒ष्णो ह॑स्ताभ्यां

गा॒यत्रेण॑ छन्द॒साऽऽ द॑दे ऽङ्गि॒रस्व॑द॒ग्नि-र॑सि ना॒रि - [] 3

TS 4.1.1.3 - Padam

य॒ज्ञप॑तिमि॒ति य॒ज्ञ - प॒तिम् । भ॒गाय॑ । दि॒व्यः । ग॒न्धर्वः॑ ॥ के॒तपू॑रि॒ति
के॒त - पूः । के॒तम् । नः । पु॒नातु॑ । वा॒चः । प॒तिः । वा॒चम् ।

अ॒द्य । स्व॒दाति॑ । नः ॥ इ॒मम् । नः । दे॒व । स॒वितः॑ । य॒ज्ञम् । प्रे॒ति ।
सु॒व । दे॒वायु॑वमि॒ति दे॒व - यु॒वम् । स॒खिवि॑दमि॒ति स॒खि - वि॒दम् ।

स॒त्राजि॑तमि॒ति स॒त्र - जि॒तम् । ध॒नजि॑तमि॒ति ध॒न - जि॒तम् ।

सु॒वर्जि॑तमि॒ति सु॒वः-जि॒तम् ॥ ऋ॒चा । स्तो॒मम् । स॒मिति॑ । अ॒र्द्धय॑ ।

गा॒यत्रेण॑ । रथ॑न्तरमि॒ति रथं॑ - त॒रम् ॥ बृ॒हत् ।

गा॒यत्र॑वर्त॒नीति॑ गा॒यत्र - वर्त॑नि ॥ दे॒वस्य॑ । त्वा । स॒वितुः॑ । प्र॒सव॑
इति॑ प्र - स॒वे । अ॒श्विनोः॑ । बा॒हुभ्यामि॑ति बा॒हु - भ्या॒म् । पू॒ष्णः ।

हस्ताभ्याम् । गायत्रेण । छन्दसा । एति । ददे । अङ्गिरस्वत् ।

अभिः । असि । नारिः । 3 (50)

TS 4.1.1.4

–रसि पृथिव्याः सधस्थादग्निं पुरीष्यमङ्गिरस्वदा भर त्रैष्टुभेन त्वा
छन्दसाऽऽ ददेऽङ्गिरस्वद्–बभ्रिरसि नारिरसि त्वया वयं सधस्थ
आ ऽग्निं शकेम खनितुं पुरीष्यं जागतेन त्वा छन्दसाऽऽ
ददे ऽङ्गिरस्वद्ब्रह्मस्त आधाय सविता बिभ्रदभिः हिरण्ययीं ।
तया ज्योतिरजस्र–मिदग्निं खात्वी न आ भराऽऽनुष्टुभेन त्वा
छन्दसाऽऽ () ददे ऽङ्गिरस्वत् ॥ 4

TS 4.1.1.4 - Padam

असि । पृथिव्याः । सधस्थादिति सध – स्थात् । अग्निम् ।
पुरीष्यम् । अङ्गिरस्वत् । एति । भर । त्रैष्टुभेन । त्वा । छन्दसा ।
एति । ददे । अङ्गिरस्वत् । बभ्रिः । असि । नारिः । असि । त्वया ।
वयम् । सधस्थ इति सध – स्थे । एति । अग्निम् । शकेम ।
खनितुम् । पुरीष्यम् । जागतेन । त्वा । छन्दसा । एति । ददे ।
अङ्गिरस्वत् । हस्ते । आधायेत्या – धाय । सविता । बिभ्रत् ।

अ॒भि॒म् । हि॒र॒ण्य॒यी॒म् ॥ तया॑ । ज्यो॒तिः॑ । अज॒स्र॒म् । इत् । अ॒ग्नि॒म् ।
खा॒त्वी । नः॑ । ए॒ति । भ॒र । आ॒नु॒ष्टु॒भे॒ने॒त्या॒नु – स्तु॒भे॒न । त्वा ।
छ॒न्द॒सा () । ए॒ति । द॒दे । अ॒ङ्गि॒र॒स्व॒त् ॥ 4 (53) (इ॒द् – य॒ज्ञं प्र॒सु॒व
– ना॒रि – रा॒नु॒ष्टु॒भे॒न त्वा छ॒न्द॒सा – त्री॒णि च) (A1)

TS 4.1.2.1

इ॒मा॒म॒गृ॒भ्णन् र॒श॒ना॒मृ॒त॒स्य॒ पूर्॒व आ॒यु॒षि वि॒द॒थे॒षु क॒व्या ।
तया॑ दे॒वाः सु॒त॒मा ब॒भू॒वुर्. ऋ॒त॒स्य॒ सा॒म॒न्थ् स॒र॒मा॒र॒प॒न्ती ॥
प्र॒तूर्तं॑ वा॒जि॒न्ना द्र॒व व॒रि॒ष्ठा॒म॒नु सँ॒व॒तं ।
दि॒वि ते ज॒न्म॒ पर॒म॒म॒न्त॒रि॒क्षे ना॒भिः पृ॒थि॒व्या॒म॒धि यो॒निः ॥
यु॒ञ्जा॒था रा॒स॒भं यु॒व॒म॒स्मिन्. या॒मे वृ॒ष॒ण्व॒सू ।
अ॒ग्निं भ॒र॒न्त॒म॒स्म॒युं ॥
यो॒गे॒यो॒गे त॒व॒स्तरं॑ वा॒जे॒वा॒जे ह॒वा॒म॒हे ।
स॒खा॒य इ॒न्द्र॒मू॒त॒ये ॥

प्र॒तूर्व॒ – [] 5

TS 4.1.2.1 - Padam

इ॒माम् । अ॒गृ॒भ्णन् । र॒श॒नाम् । ऋ॒त॒स्य॑ । पू॒र्व॑ । आ॒यु॒षि॑ । वि॒द॒थे॑षु ।
क॒व्या ॥ तया॑ । दे॒वाः । सु॒तम् । ए॒ति॑ । ब॒भू॒वुः । ऋ॒त॒स्य॑ । सा॒मन् ।
स॒रम् । आ॒र॒प॒न्ती॑त्या – र॒प॒न्ती ॥ प्र॒तूर्त॑मि॒ति॒ प्र – तूर्त॑म् । वा॒जि॒न् ।
ए॒ति॑ । द्र॒व । व॒रि॒ष्ठाम् । अ॒न्वि॒ति॑ । स॒व॒त॒मि॒ति॒ सं – व॒त॒म् ॥ दि॒वि॒ ।
ते । ज॒न्म॑ । प॒र॒मम् । अ॒न्त॒रि॒क्षे॑ । ना॒भिः । पृ॒थि॒व्याम् । अधी॑ति ।
यो॒निः ॥ यु॒ज्जा॒थाम् । रा॒स॒भम् । यु॒वम् । अ॒स्मिन् । या॒मे॑ ।
वृ॒ष॒ण्व॒सू इ॒ति॑ वृ॒ष॒ण् – व॒सू ॥ अ॒ग्नि॑म् । भ॒र॒न्त॒म् ।
अ॒स्म॒यु॒मि॒त्य॒स्म – यु॒म् ॥ यो॒गे॒यो॒ग इ॒ति॑ यो॒गे – यो॒गे ।
त॒व॒स्तर॑मि॒ति॒ त॒वः – त॒र॒म् । वा॒जे॒वा॒ज इ॒ति॑ वा॒जे – वा॒जे ।
ह॒वा॒म॒हे ॥ स॒खा॒यः । इ॒न्द्र॒म् । ऊ॒त॒ये ॥
प्र॒तूर्व॑न्नि॒ति॒ प्र – तूर्व॑न् । 5 (50)

TS 4.1.2.2

– ने॒ह्य॒व॒क्रा॒म॒न्न॒श॒स्ती॑ रु॒द्र॒स्य॑ गा॒ण॒प॒त्यान् म॒यो॒भू॒रे॒हि॑ ।
उ॒र्व॒न्त॒रि॒क्ष॒म॒न्वि॒हि॑ स्व॒स्ति॒ग॒व्यू॒ति॒–र॒भ॒या॒नि कृ॒ण्व॒न् ॥
पू॒ष्णा स॒यु॒जा स॒ह ।

पृ॒थि॒व्याः स॒ध॒स्था॒द॒ग्निं पु॒री॒ष्य-म॒ङ्गि॒र॒स्व-द॒च्छे॒ह्य॒ग्निं पु॒री॒ष्य
-म॒ङ्गि॒र॒स्वद-च्छे॒मोऽग्निं पु॒री॒ष्य-म॒ङ्गि॒र॒स्वद्-भ॒रि॒ष्या॒मोऽग्निं पु॒री॒ष्य
-म॒ङ्गि॒र॒स्वद्-भ॒रामः ॥

अ॒न्व॒ग्नि॒रुष॒सा-म॒ग्र॒म॒ख्य-द॒न्व॒हा॒नि प्र॒थ॒मो जा॒त॒वे॒दाः ।

अ॒नु सूर्य॑स्य - [] 6

TS 4.1.2.2 - Padam

ए॒ति । इ॒हि । अ॒व॒क्राम॑न्नित्य॒व - क्राम॑न् । अ॒श॒स्तीः । रु॒द्र॒स्य ।
गा॒ण॒प॒त्यादि॑ति गा॒ण - प॒त्यात् । म॒यो॒भू॒रिति॑ म॒यः - भूः । ए॒ति ।
इ॒हि ॥ उ॒रु । अ॒न्त॒रि॒क्षम् । अ॒न्वि॒ति । इ॒हि । स्व॒स्ति॒ग॒व्यू॒तिरिति॑
स्व॒स्ति - ग॒व्यू॒तिः । अ॒भ॒या॒नि । कृ॒ण्व॒न् ॥ पू॒ष्णा । स॒यु॒जेति॑
स - यु॒जा ॥ स॒ह ॥ पृ॒थि॒व्याः । स॒ध॒स्था॒दि॒ति स॒ध - स्था॒त् ।
अ॒ग्निम् । पु॒री॒ष्यम् । अ॒ङ्गि॒र॒स्वत् । अ॒च्छ । इ॒हि । अ॒ग्निम् ।
पु॒री॒ष्यम् । अ॒ङ्गि॒र॒स्वत् । अ॒च्छ । इ॒मः । अ॒ग्निम् । पु॒री॒ष्यम् ।
अ॒ङ्गि॒र॒स्वत् । भ॒रि॒ष्या॒मः । अ॒ग्निम् । पु॒री॒ष्यम् । अ॒ङ्गि॒र॒स्वत् ।
भ॒रामः ॥ अ॒न्वि॒ति । अ॒ग्निः । उ॒ष॒साम् । अ॒ग्रम् । अ॒ख्य॑त् ।

अ॒न्वि॒ति॒ । अ॒हा॒नि॒ । प्र॒थ॒मः॒ । जा॒त॒वे॒दा इति॑ जा॒त – वे॒दाः॒ ॥

अ॒न्वि॒ति॒ । सू॒र्य॑स्य । 6 (50)

TS 4.1.2.3

पु॒रु॒त्रा च॑ र॒श्मी॑ननु॒ द्या॒वापृ॑थि॒वी आ त॑तान ॥

आ॒ग॒त्य॒ वा॒ज्य॑द॒ध्व॒नः॒ सर्वा॑ मृ॒धो वि॑ धू॒नु॒ते ।

अ॒ग्नि॑ꣳ स॒ध॒स्थे॑ म॒ह॒ति चक्षु॑षा नि चि॒की॑षते ॥

आ॒क्र॒म्य॒ वा॒जिन् पृ॑थि॒वीम॒ग्निमि॑च्छ रु॒चा त्वं॑ ।

भू॒म्या वृ॒त्वाय॑ नो ब्रू॒हि यतः॑ ख॒नाम॒ तं व॑यं ॥

द्यौ॒स्ते पृ॒ष्ठं पृ॑थि॒वी स॒ध॒स्थमा॒त्मा ऽन्त॑रि॒क्षꣳ स॒मु॒द्रस्ते॒ योनिः॑ ।

वि॒ख्याय॑ चक्षु॑षा त्वम॒भि तिष्ठ॑ – [] 7

TS 4.1.2.3 - Padam

पु॒रु॒त्रेति॑ पु॒रु – त्रा । च॒ । र॒श्मीन् । अ॒न्वि॒ति॒ । द्या॒वापृ॑थि॒वी इति॑

द्या॒वा – पृ॑थि॒वी । ए॒ति॒ । त॒तान॑ ॥ आ॒ग॒त्येत्या॑ – ग॒त्य॒ । वा॒जी ।

अ॒द॒ध्व॒नः॒ । सर्वाः॑ । मृ॒धः॒ । वी॒ति॒ । धू॒नु॒ते ॥ अ॒ग्नि॑म् ।

स॒ध॒स्थ इति॑ स॒ध – स्थे॑ । म॒ह॒ति॒ । चक्षु॑षा । नी॒ति॒ । चि॒की॑षते ॥

आ॒क्र॒म्येत्या॑ – क्र॒म्य॒ । वा॒जिन् । पृ॑थि॒वीम् । अ॒ग्नि॑म् । इ॒च्छ॒ ।

रु॒चा । त्वम् ॥ भू॒म्याः । वृ॒त्वाय । नः । ब्रू॒हि । यतः । ख॒नाम । तम् ।
व॒यम् ॥ द्यौः । ते । पृ॒ष्ठम् । पृ॒थि॒वी । स॒ध॒स्थ॒मिति॑ स॒ध – स्थ॒म् ।
आ॒त्मा । अ॒न्तरि॑क्षम् । स॒मु॒द्रः । ते । यो॒निः ॥ वि॒ख्या॒येति॑
वि – ख्या॒य । चक्षु॑षा । त्वम् । अ॒भी॒ति । तिष्ठ । 7 (50)

TS 4.1.2.4

पृ॒त॒न्यतः॑ ॥

उ॒त्क्राम॑ म॒हते॑ सौ॒भगा॒या-स्मा॒दा॒स्थाना॑द् द्र॒वि॒णो॒दा वा॑जिन् ।
व॒यञ् स्या॑म सु॒मतौ॑ पृ॒थि॒व्या अ॒ग्निं ख॑निष्यन्त॒ उप॑स्थे॒ अस्याः॑ ॥
उ॒द॒क्र॒मीद् द्र॒वि॒णो॒दा वा॒ज्य॒र्वा॒ऽकः॑ स लो॒कञ् सु॑कृतं पृ॒थि॒व्याः ।
ततः॑ ख॒नेम॑ सु॒प्र॒ती॒कम॒ग्निञ् सु॒वो रु॑हा॒णा अ॒धि ना॑क॒ उत्त॑मे ॥
अ॒पो दे॒वीरु॑प॒ सृज॑ म॒धु॒मती॑रय॒क्ष्माय॑ प्र॒जाभ्यः॑ ।
तासा॑ञ् स्था॒नादु॒ज्जि॒हता॑-मोष॒धयः॑ सु॒पिप्प॒लाः ॥
जिघ॑र्म्य- [] 8

TS 4.1.2.4 - Padam

पृ॒तन्य॑तः ॥ उ॒दि॒ति॑ । क्रा॒म॒ । म॒ह॒ते॑ । सौ॒भ॒गाय॑ । अ॒स्मात् ।
आ॒स्थाना॑दि॒त्या ॥ – स्था॒नात् । द्र॒वि॒णो॒दा इति॑ द्र॒वि॒णः – दाः ।
वा॒जि॒न् ॥ व॒यम् । स्या॒म॒ । सु॒म॒तावि॑ति सु – म॒तौ । पृ॒थि॒व्याः ।
अ॒ग्नि॑म् । ख॒नि॒ष्यन्तः॑ । उ॒प॒स्थ इत्यु॑प – स्थे । अ॒स्याः ॥ उ॒दि॒ति॑ ।
अ॒क्र॒मीत् । द्र॒वि॒णो॒दा इति॑ द्र॒वि॒णः – दाः । वा॒जी । अ॒र्वा । अ॒क्रः ।
सः । लो॒कम् । सु॒कृ॒तमि॑ति सु-कृ॒तम् । पृ॒थि॒व्याः ॥ त॒तः । ख॒ने॒म॒ ।
सु॒प्र॒ती॒कमि॑ति सु-प्र॒ती॒कम् । अ॒ग्नि॑म् । सु॒वः । रु॒हा॒णाः । अधी॑ति ।
ना॒के ॥ उ॒त्त॒म इत्यु॑त् – त॒मे ॥ अ॒पः । दे॒वीः । उ॒पे॒ति॑ । सृ॒ज॒ ।
म॒धु॒म॒ती॒रि॒ति॑ म॒धु – म॒तीः । अ॒य॒क्ष्मा॑य । प्र॒जा॒भ्य इति॑ प्र-जा॒भ्यः ॥
ता॒सा॒म् ॥ स्था॒नात् । उ॒दि॒ति॑ । जि॒ह॒ता॒म् । ओष॑धयः ।
सु॒पि॒प्प॒ला इति॑ सु – पि॒प्प॒लाः ॥ जिघ॑र्मि । 8 (50)

TS 4.1.2.5

–ग्निं॑ म॒न॒सा घृ॑तेन प्र॒ति॒क्ष्यन्तं॑ भु॒व॒ना॒नि वि॒श्वा ॥
पृ॒थुं ति॑रश्वा व॒य॒सा बृ॑हन्तं व्य॒चि॒ष्ठ॒म॒न् र॒भ॒सं वि॑दानं ॥
आ त्वा जिघ॑र्मि व॒च॒सा घृ॑तेनाऽर॒क्ष॒सा म॒न॒सा तज्जु॑षस्व ।

म॒र्य॒श्रीः॑ स्फृ॒हय॑द्वर्णो॒ अ॒ग्नि॒र्ना॒भि॒मृ॒शे॑ त॒नु॒वा॒ ज॒र्ह॒षा॒णः॑ ॥
परि॑ वा॒ज॒प॒तिः॑ क॒वि॒र॒ग्नि॒र्ह॒व्या॒न्य॒क्र॒मी॒त् ।
दध॑द् र॒त्नानि॑ दा॒शु॒षे ॥
परि॑ त्वा॒ग्ने॒ पुरं॑ व॒यं व॑प्र॒ सह॑स्य धी॒महि॑ ।
धृ॒ष॒द्व॒र्णं दि॒वे॒दि॒वे भे॒त्ता॒रं () भ॒ङ्गु॒रा॒व॒तः॑ ॥
त्व॒म॒ग्ने द्यु॒भि॒स्त्व॒मा॒शु॒शु॒क्ष॒णि॒स्त्व॒म॒द्भ्य॒स्त्व॒म॒श्म॒न॒स्परि॑ ।
त्वं व॑नै॒भ्य स्त्व॑मोष॒धी॒भ्य स्त्वं॑ नृ॒णां नृ॒प॒ते जा॒य॒से शु॒चिः॑ ॥ 9

TS 4.1.2.5 - Padam

अ॒ग्नि॒म् । म॒न॒सा । घृ॒ते॒न । प्र॒ति॒क्ष्य॒न्त॒मि॒ति॒ प्र॒ति – क्ष्य॑न्तम् ॥
भु॒व॒ना॒नि । वि॒श्वा ॥ पृ॒थु॒म् । ति॒र॒श्वा । व॒य॒सा । बृ॒ह॒न्त॒म् । व्य॑चि॒ष्ठ॒म् ।
अ॒न्न॒म् । र॒भ॒स॒म् । वि॒दा॒न॒म् ॥ ए॒ति॒ । त्वा॒ । जि॒घ॒र्मि॒ । व॒च॒सा ।
घृ॒ते॒न । अ॒र॒क्ष॒सा । म॒न॒सा । तत् । जु॒ष॒स्व ॥ म॒र्य॒श्री॒रि॒ति॒ म॒र्य॒-श्रीः॑ ।
स्फृ॒हय॑द्वर्ण इति॑ स्फृ॒हय॑त् – वर्णः॑ । अ॒ग्निः । न । अ॒भि॒मृ॒श
इ॒त्य॒भि – मृ॒शे॑ । त॒नु॒वा॒ । ज॒र्ह॒षा॒णः॑ ॥ प॒री॒ति॒ । वा॒ज॒प॒ति॒रि॒ति॒
वा॒ज – प॒तिः॑ । क॒विः । अ॒ग्निः । ह॒व्या॒नि॒ । अ॒क्र॒मी॒त् ॥ दध॑त् ।

रत्नानि । दा॒शु॒षे ॥ परी॒ति । त्वा । अ॒ग्ने । पु॒रम् । व॒यम् । वि॒प्रम् ।
सह॒स्य । धी॒महि ॥ धृ॒ष॒द्वर्ण॑मि॒ति धृ॒षत् – वर्ण॑म् । दि॒वेदि॒व इति॑
दि॒वे – दि॒वे । भे॒त्ता॒रम् () । भ॒ङ्गुरा॑व॒त इति॑ भ॒ङ्गुर – व॒तः ॥
त्वम् । अ॒ग्ने । द्यु॒भिरि॑ति द्यु – भिः । त्वम् । आ॒शु॒शुक्ष॑णिः ।
त्वम् । अ॒द्भ्य इत्य॑त् – भ्यः । त्वम् । अ॒श्म॑नः । परि ॥ त्वम् ।
वने॑भ्यः । त्वम् । ओष॑धी॒भ्य इत्योष॑धि – भ्यः । त्वम् । नृ॒णाम् ।
नृ॒प॒त इति॑ नृ॒प॒ते । जा॒य॒से । शु॒चिः ॥ 9 (70) (प्र॒तू॒र्वन्थ –
सूर्य॑स्य – तिष्ठ – जिघ॑र्मि – भे॒त्ता॒रं – वि॒शति॑श्च) (A2)

TS 4.1.3.1

दे॒वस्य॑ त्वा स॒वि॒तुः प्र॒स॒वेऽश्वि॑नो॒र् बा॒हु॒भ्यां पू॒ष्णो ह॒स्ता॒भ्यां
पृ॒थि॒व्याः स॒ध॒स्थेऽग्निं॑ पु॒री॒ष्य – म॒ङ्गिर॑स्वत् ख॒नामि॑ ॥
ज्योति॑ष्मन्तं त्वा॒ग्ने सु॒प्र॒ती॒क॒म॒ज॒स्रेण॑ भा॒नु॒ना दी॒द्यानं॑ ।
शि॒वं प्र॒जा॒भ्योऽहि॑स॒न्तं पृ॒थि॒व्याः स॒ध॒स्थेऽग्निं॑ पु॒री॒ष्य
– म॒ङ्गिर॑स्वत् ख॒नामि॑ ॥
अ॒पां पृ॒ष्ठ॒म॒सि स॒प्र॒था उ॒र्व॒ग्निं भ॒रि॒ष्य॑द॒प॒रा॒व॒पि॒ष्ठं ।

व॒र्द्ध॑मा॒नं म॒ह आ च पु॒ष्करं दि॒वो मा॒त्रया वरि॒णा प्रथ॑स्व ॥

श॒र्म च स्थो॑ – [] 10

TS 4.1.3.1 - Padam

दे॒वस्य॑ । त्वा । स॒वि॒तुः । प्र॒स॒व इति॑ प्र – स॒वे । अ॒श्विनोः॑ ॥
बा॒हुभ्या॑मि॒ति बा॒हु – भ्या॑म् । पू॒ष्णः । ह॒स्ताभ्या॑म् । पृ॒थि॒व्याः ॥
स॒धस्थ॑ इति॑ स॒ध – स्थे॑ । अ॒ग्निम् । पु॒री॒ष्यम् ॥ अ॒ङ्गिर॑स्वत् ।
ख॒नामि॑ ॥ ज्योति॑ष्मन्तम् । त्वा । अ॒ग्ने ।
सु॒प्रती॑कमि॒ति सु – प्रती॑कम् । अ॒जस्रे॑ण । भा॒नुना॑ ॥ दी॒द्यान॑म् ॥
शि॒वम् । प्र॒जाभ्य॑ इति॑ प्र – जा॒भ्यः । अ॒हि॒स॒न्तम् । पृ॒थि॒व्याः ॥
स॒धस्थ॑ इति॑ स॒ध – स्थे॑ । अ॒ग्निम् । पु॒री॒ष्यम् ॥ अ॒ङ्गिर॑स्वत् ।
ख॒नामि॑ ॥ अ॒पाम् । पृ॒ष्ठम् । अ॒सि । स॒प्रथा॑ इति॑ स – प्र॒थाः ॥
उ॒रु । अ॒ग्निम् । भ॒रि॒ष्यत् । अ॒परा॑वपि॒ष्ठमि॒त्यप॑रा – व॒पि॒ष्ठम् ॥
व॒र्द्ध॑मा॒नम् । म॒हः । ए॒ति । च । पु॒ष्कर॑म् । दि॒वः । मा॒त्रया ।
वरि॒णा । प्रथ॑स्व ॥ श॒र्म । च । स्थः॑ । 10 (50)

TS 4.1.3.2

वर्म॑ च स्थो॑ अ॒च्छि॒द्रे बहु॑ले उ॒भे ।
व्यच॑स्वती सं व॑सा॒थां भ॒र्त॒म॒ग्निं पु॒री॒ष्यं ॥
सं व॑सा॒थां सु॒व॒र्वि॒दा स॒मी॒ची उ॒र॒सा त्म॒ना ॥
अ॒ग्नि॒म॒न्त॒र् भ॒रि॒ष्य॒न्ती ज्यो॒ति॒ष्म॒न्त म॒ज॒स्र॒मि॒त् ॥
पु॒री॒ष्योऽसि॑ वि॒श्व॒भ॒राः ।
अथ॑र्वा त्वा प्रथ॑मो नि-र॑मन्थद॒ग्ने ॥
त्वा॒म॒ग्ने पु॒ष्क॒रा॒द॒द्ध्य॑थ॒र्वा नि-र॑मन्थ॒त ।
मूर्द्ध॑नो वि॒श्व॒स्य॑ वा॒घ॒तः ॥
तमु॑ त्वा द॒द्ध्य॑ङ्ङ॒षिः पु॒त्र ई॒धे- [] 11

TS 4.1.3.2 - Padam

वर्म॑ । च । स्थः॑ । अ॒च्छि॒द्रे इति॑ । बहु॑ले इति॑ । उ॒भे इति॑ ॥
व्यच॑स्वती इति॑ । स॒मि॒ति । व॒सा॒था॒म् । भ॒र्त॒म् । अ॒ग्नि॒म् ।
पु॒री॒ष्यम् ॥ स॒मि॒ति । व॒सा॒था॒म् । सु॒व॒र्वि॒देति॑ सु॒वः - वि॒दा ॥
स॒मी॒ची इति॑ । उ॒र॒सा । त्म॒ना ॥ अ॒ग्नि॒म् । अ॒न्तः । भ॒रि॒ष्य॒न्ती इति॑ ।

ज्योतिष्मन्तम् । अजस्रम् । इत् ॥ पुरीष्यः । असि । विश्वभरा इति
विश्व – भराः ॥ अथर्वा । त्वा । प्रथमः । निरिति । अमन्थत् ।
अग्ने ॥ त्वाम् । अग्ने । पुष्करात् । अधीति । अथर्वा । निरिति ।
अमन्थत ॥ मूर्द्धनः । विश्वस्य । वाघतः ॥ तम् । उ । त्वा ।
दद्ध्यङ् । ऋषिः । पुत्रः । ईधे । 11 (50)

TS 4.1.3.3

अथर्वणः ।

वृत्रहणं पुरन्दरं ॥

तमु त्वा पाथ्यो वृषा समीधे दस्युहन्तमं ।

धनञ्जयञ् रणैरणे ॥

सीद होतः स्व उ लोके चिकित्वान्त् सादया यज्ञञ्

सुकृतस्य योनौ ।

देवावीर्देवान्. हविषा यजास्यग्ने बृहद्-यजमाने वयो धाः ॥

नि होता होतृषदने विदानस्त्वेषो दीदिवाञ् असदथ् सुदक्षः ।

अद॒ब्ध॒व्र॒त॒प्र॒म॒ति॒र्व॒सि॒ष्ठः॑ स॒ह॒स्रं॒भ॒रः॑ शु॒चि॒जि॒ह्वो अ॒ग्निः॑ ॥

स॒ꣳ सी॒द॒स्व॒ म॒हाꣳ अ॒सि॒ शो॒च॒स्व- [] 12

TS 4.1.3.3 - Padam

अथ॑र्वणः ॥ वृ॒त्र॒ह॒ण॒मि॒ति॑ वृ॒त्र - ह॒न॒म् । पु॒र॒न्द॒र॒मि॒ति॑ पु॒रं - द॒र॒म् ॥

त॒म् । उ॒ । त्वा॒ । पा॒थ्यः॑ । वृ॒षा॑ । स॒मि॒ति॑ । ई॒धे॒ ।

द॒स्यु॒ह॒न्त॒म॒मि॒ति॑ द॒स्यु॒-ह॒न्त॒म॒म् ॥ ध॒न॒ञ्ज॒य॒मि॒ति॑ ध॒नं - ज॒य॒म् ।

र॒णै॒र॒ण इति॑ र॒णै॒-र॒णे ॥ सी॒द॑ । हो॒तः॑ । स्वे॒ । उ॒ । लो॒के॒ ।

चि॒कि॒त्वा॒न् । सा॒द॒य॑ । य॒ज्ञ॒म् । सु॒कृ॒त॒स्ये॒ति॑ सु॒-कृ॒त॒स्य॑ । यो॒नौ॑ ॥

दे॒वा॒वी॒रि॒ति॑ दे॒व॒-अ॒वीः॑ । दे॒वा॒न् । ह॒वि॒षा॑ । य॒जा॒सि॒ । अ॒ग्ने॑ । बृ॒ह॒त् ।

य॒ज॒मा॒ने॒ । व॒यः॑ । धाः॑ ॥ नी॒ति॑ । हो॒ता॑ । हो॒तृ॒ष॒द॒न इति॑ हो॒तृ॒-स॒द॒ने॒ ।

वि॒दा॒नः॑ । त्वे॒षः॑ । दी॒दि॒वा॒न् । अ॒स॒द॒त् । सु॒द॒क्ष इति॑ सु॒ - द॒क्षः॑ ॥

अद॒ब्ध॒व्र॒त॒प्र॒म॒ति॒रि॒त्य॒द॒ब्ध॒व्र॒त॒-प्र॒म॒तिः॑ । व॒सि॒ष्ठः॑ । स॒ह॒स्रं॒भ॒र इति॑

स॒ह॒स्रं॒-भ॒रः॑ । शु॒चि॒जि॒ह्व इति॑ शु॒चि॒ - जि॒ह्वः॑ । अ॒ग्निः॑ ॥ स॒मि॒ति॑ ।

सी॒द॒स्व॒ । म॒हा॒न् । अ॒सि॒ । शो॒च॒स्व । 12 (50)

TS 4.1.3.4

दे॒व॒वी॒त॒मः॑ ।

वि॒ धू॒म॒ग्ने॑ अ॒रु॒षं॑ मि॒ये॒द्ध्य॑ सृ॒ज प्र॑श॒स्त द॒र्श॒तं॑ ॥

ज॒नि॒ष्वा॒ हि॒ जे॒न्यो॒ अ॒ग्रे॒ अ॒ह्मा॑ ह॒तो॒ ह॒तेष्व॑रु॒षो व॒नेषु॑ ।

द॒मे॒द॒मे स॒प्त र॒त्ना द॒धानो॑ऽग्नि॒र्हो॒ता नि॒ **ष॒सा॒दा॒** य॒जी॒यान् ॥ 13

TS 4.1.3.4 - Padam

दे॒व॒वी॒त॒म इति॑ दे॒व – वी॒त॒मः॑ ॥ वी॒ति॑ । धू॒म॒म् । अ॒ग्ने॑ । अ॒रु॒ष॒म् ।

मि॒ये॒द्ध्य॑ । सृ॒ज । प्र॒श॒स्तेति॑ प्र – श॒स्त॒ । द॒र्श॒त॒म् ॥ ज॒नि॒ष्वा॒ ।

हि॒ । जे॒न्यः॑ । अ॒ग्रे॑ । अ॒ह्मा॑म् । ह॒तः॑ । ह॒तेषु॑ । अ॒रु॒षः॑ । व॒नेषु॑ ॥

द॒मे॒द॒म इति॑ द॒मे – द॒मे॑ । स॒प्त॒ । र॒त्ना॑ । द॒धा॒नः॑ । अ॒ग्निः॑ । हो॒ता॑ ।

नी॒ति॑ । स॒सा॒दा॒ । य॒जी॒यान् ॥ 13 (27)

(स्थ – ई॒धे – शोच॑स्व – स॒प्तवि॑ंश॒तिश्च॑) – (A3)

TS 4.1.4.1

सं ते वा॒यु॒र्मा॒तरि॑श्वा द॒धातू॑त्ता॒नायै॑ हृद॒यं य॑द्वि॒लिष्टं॑ ।

दे॒वा॒नां य॑श्चरति प्रा॒णथे॑न तस्मै च दे॒वि व॑ष॒डस्तु॑ तु॒भ्यं ॥

सु॒जा॒तो ज्योति॑षा स॒ह श॒र्म व॒रूथ॑मा ऽस॒दः सु॒वः॑ ।

वासो॑ अ॒ग्ने वि॒श्वरू॒पꣳ सं॑ व्य॒यस्व॑ वि॒भाव॒सो ॥

उदु॑ तिष्ठ॒ स्व॒ध्वरा॒वा॑ नो दे॒व्या कृ॒पा ।

दृ॒शे च॑ भा॒सा बृ॒हता॑ सु॒शु॒क्वनि॒रा अ॒ग्ने या॒हि सु॒शस्ति॑भिः ॥ 14

TS 4.1.4.1 - Padam

समि॑ति । ते । वा॒युः । मा॒तरि॒श्वा॑ ॥ द॒धातु॑ । उ॒त्ता॒नाया॑

इ॒त्युत् – ता॒नायै॑ ॥ हृ॒दय॑म् । यत् । वि॒लि॒ष्टमि॑ति वि – लि॒ष्टम् ॥

दे॒वाना॑म् । यः । च॒रति॑ । प्रा॒णथे॒नेति॑ प्र – अ॒नथे॑न । तस्मै॑ । च ।

दे॒वि । व॒षट् । अ॒स्तु । तु॒भ्यम् ॥ सु॒जा॒त इति॑ सु॒जा॒तः ।

ज्यो॑तिषा । स॒ह । श॒र्म । व॒रूथ॑म् । ए॒ति । अ॒स॒दः । सु॒वः ॥

वा॒सः । अ॒ग्ने । वि॒श्वरू॒पमि॑ति वि॒श्व – रू॒पम् । समि॑ति । व्य॒यस्व॑ ।

वि॒भा॒व॒सो इति॑ वि॒भा॒व॒सो ॥ उ॒दि॒ति । उ॒ । तिष्ठ॑ । स्व॒ध्वरे॑ति

सु – अ॒ध्वर॑ । अ॒व । नः । दे॒व्या । कृ॒पा ॥ दृ॒शे । च॒ । भा॒सा ।

बृ॒हता॑ । सु॒शु॒क्वनि॒रिति॑ सु॒शु॒क्वनिः॑ । ए॒ति । अ॒ग्ने । या॒हि ।

सु॒शस्ति॑भिरिति॑ सु॒शस्ति॑ – भिः ॥ 14 (50)

TS 4.1.4.2

ऊ॒र्ध्व ऊ॒ षु॑ ण॒ ऊ॒तये॑ ति॒ष्ठा॑ दे॒वो न॑ स॒विता॑ ।
ऊ॒र्ध्वो वा॒जस्य॑ स॒निता॑ यद॒ज्जिभि॑र् वा॒घद्वि॑र् वि॒ह्वया॑महे ॥
स जा॒तो गर्भो॑ अ॒सि रो॑द॒स्यो॒ग्ने चारु॑र्विभृ॒त ओष॑धीषु ।
चि॒त्रः शि॒शुः परि॑ तमा॒स्य॒क्तः प्र मा॒तृभ्यो॑ अधि॒ कनि॑क्रदद् गाः ॥
स्थि॒रो भव॑ वी॒ड्वङ्ग॑ आ॒शुर्भव॑ वा॒ज्यर्वन् ।
पृथु॑र्भव॒ सुष॑दस्त्वम॒ग्नेः पु॒रीष॑वाहनः ॥
शि॒वो भव॑ – [] 15

TS 4.1.4.2 - Padam

ऊ॒र्ध्वः । उ॒ । स्वि॒ति । नः॒ । ऊ॒तये॑ । ति॒ष्ठ । दे॒वः । न । स॒विता॑ ॥
ऊ॒र्ध्वः । वा॒जस्य॑ । स॒निता॑ । यत् । अ॒ज्जिभि॑रि॒त्यज्जि॑ – भिः ।
वा॒घद्वि॑रिति॒ वाघ॑त् – भिः । वि॒ह्वया॑मह इति॒ वि – ह्वया॑महे ॥ सः ।
जा॒तः । गर्भः॑ । अ॒सि । रो॑द॒स्योः । अ॒ग्ने । चारुः॑ । विभृ॒त इति॑
वि – भृ॒तः । ओष॑धीषु ॥ चि॒त्रः । शि॒शुः । परि॑ति । तमा॒सि ।
अ॒क्तः । प्रे॒ति । मा॒तृभ्य॑ इति॒ मा॒तृ – भ्यः॑ । अधि॑ति । कनि॑क्रदत् ।

गाः ॥ स्थिरः । भव । वीड्वङ्ग इति वीडु – अङ्गः । आशुः । भव ।
वाजी । अर्वन् ॥ पृथुः । भव । सुषद इति सु – सदः । त्वम् ।
अग्नेः । पुरीषवाहन इति पुरीष – वाहनः ॥ शिवः । भव । 15 (50)

TS 4.1.4.3

प्रजाभ्यो मानुषीभ्यस्त्वमङ्गिरः ।
मा द्यावापृथिवी अभि शूशुचो माऽन्तरिक्षं मा वनस्पतीन् ॥
प्रेतु वाजी कनिक्रद-न्नानदद्-रासभः पत्वा ।
भरन्नग्निं पुरीष्यं मा पाद्यायुषः पुरा ॥
रासभो वां कनिक्रदथ् सुयुक्तो वृषणा रथे ।
स वामग्निं पुरीष्यमाशुर्दूतो वहदितः ॥
वृषा ऽग्निं वृषणं भरन्नपां गर्भं समुद्रियं ।
अग्न आ याहि- [] 16

TS 4.1.4.3 - Padam

प्रजाभ्य इति प्र – जाभ्यः । मानुषीभ्यः । त्वम् । अङ्गिरः ॥
मा । द्यावापृथिवी इति द्यावा – पृथिवी । अभीति । शूशुचः । मा ।
अन्तरिक्षम् । मा । वनस्पतीन् ॥ प्रेति । एतु । वाजी । कनिक्रदत् ।

नानदत् । रासभः । पत्वा ॥ भरन् । अग्निम् । पुरीष्यम् । मा ।
पादि । आयुषः । पुरा ॥ रासभः । वाम् । कनिक्रदत् ।
सुयुक्त इति सु – युक्तः । वृषणा । रथे ॥ सः । वाम् । अग्निम् ।
पुरीष्यम् । आशुः । दूतः । वहात् । इतः ॥ वृषा । अग्निम् ।
वृषणम् । भरन् । अपाम् । गर्भम् । समुद्रियम् ॥

अग्ने । एति । याहि । 16 (50)

TS 4.1.4.4

वीतय ऋतं सत्यं ॥
ओषधयः प्रति गृहीताग्निमेतं शिव-मायन्तमभ्यत्र युष्मान् ।
व्यस्यन् विश्वा अमतीररातीर् निषीदन्नो अप दुर्मतिं हनत् ॥
ओषधयः प्रति मोदद्ध्वमेनं पुष्पावतीः सुपिप्पलाः ।
अयं वो गर्भ ऋत्वियः प्रत्नं सधस्थमा ऽसदत् ॥ 17

TS 4.1.4.4 - Padam

वीतये । ऋतम् । सत्यम् ॥ ओषधयः । प्रतीति । गृहीत । अग्निम् ।
एतम् । शिवम् । आयन्तमित्या – यन्तम् । अभीति । अत्र । युष्मान् ॥

व्यस्यन्निति वि – अस्यन् । विश्वाः । अमतीः । अरातीः ।
निषीदन्नि ति नि – सीदन् । नः । अपेति । दुर्मतिमिति दुः – मतिम् ।
हनत् ॥ ओषधयः । प्रतीति । मोदध्वम् । एनम् ।
पुष्पावतीरिति पुष्प – वतीः । सुपिप्पला इति सु – पिप्पलाः ॥
अयम् । वः । गर्भः । ऋत्वियः । प्रन्नम् । सधस्थमिति सध – स्थम् ।
एति । असदत् ॥ 17 (36) (सुशस्तिभिः – शिवो भव – याहि –
षट्त्रिंशच्च) (A4)

TS 4.1.5.1

वि पाजसा पृथुना शोशुचानो बाधस्व द्विषो रक्षसो अमीवाः ।
सुशर्मणो बृहतः शर्मणि स्यामग्नेरहं सुहवस्य प्रणीतौ ॥
आपो हि ष्टा मयोभुवस्ता न ऊर्जे दधातन ।
महे रणाय चक्षसे ॥
यो वः शिवतमो रसस्तस्य भाजयतेह नः ।
उशतीरिव मातरः ॥
तस्मा अरं गमाम वो यस्य क्षयाय जिन्वथ ।

आपो जनयथा च नः ॥

मित्रः – [] 18

TS 4.1.5.1 - Padam

वीति॑ । पाजसा॑ । पृथुना॑ ॥ शोशु॑चानः । बाध॑स्व । द्विषः॑ । रक्ष॑सः ।
अमी॑वाः ॥ सु॒शर्म॑ण इति॑ सु – शर्म॑णः । बृ॒हतः॑ । शर्म॑णि । स्या॒म् ।
अ॒ग्नेः । अ॒हम् । सु॒हव॑स्येति॑ सु-हव॑स्य । प्र॒णीता॑विति॒ प्र-नी॒तौ ॥
आपः॑ । हि । स्थ । मयो॑भुव इति॑ मयः-भुवः॑ । ताः । नः । ऊ॒र्जे ।
दधा॑तन ॥ महे॑ । रणा॑य । चक्ष॑से ॥ यः । वः । शि॒वत॑म इति॑
शि॒व-त॑मः । रसः॑ । तस्य॑ । भा॒जय॑त । इ॒ह । नः ॥ उ॒शतीः॑ । इ॒व ।
मा॒तरः ॥ तस्मै॑ ॥ अ॒रम् । ग॒माम॑ । वः । यस्य॑ । क्षया॑य । जि॒न्वथ॑ ॥
आपः॑ । ज॒नय॑थ । च । नः ॥ मि॒त्रः । 18 (50)

TS 4.1.5.2

सꣳसृ॑ज्य पृथि॑वीं भू॒मिं च॑ ज्योति॑षा सह ।
सुजा॑तं जा॒तवे॑दसम॒ग्निं वै॑श्वा॒नरं॑ वि॒भुं ॥
अ॒यक्ष्मा॑य त्वा सꣳ सृ॑जामि प्र॒जाभ्यः॑ ।

वि॒श्वे॑ त्वा दे॒वा वै॒श्वान॒राः स॒ꣳ सृ॒जन्त्वा-नु॒ष्टु॒भेन॒ छन्द॑सा अ॒ङ्गिर॒स्वत् ॥
रु॒द्राः सं॒भृत्य॑ पृथि॒वीं बृ॒हज्ज्योतिः॑ समी॒धिरे ।
तेषां॑ भा॒नु-रज॑स्र इच्छु॒क्रो दे॒वेषु॑ रोचते ॥
स॒ꣳसृ॒ष्टां वसु॑भी रु॒द्रैर्द्धी॑रैः कर्म॒ण्यां मृदं॑ ।
हस्ता॑भ्यां मृ॒द्धीं कृ॒त्वा सिनी॑वा॒ली करो॒तु - [] 19

TS 4.1.5.2 - Padam

स॒ꣳसृ॒ज्येति॑ सं - सृ॒ज्य । पृथि॒वीम् । भू॒मिम् । च । ज्योति॑षा ।
सह ॥ सुजा॑तमि॒ति सु - जा॒तम् । जा॒तवे॑दसमि॒ति जा॒त-वे॑दसम् ।
अ॒ग्निम् । वै॒श्वान॒रम् । वि॒भुमि॑ति वि - भुम् ॥ अ॒यक्ष्मा॑य । त्वा ।
समि॑ति । सृ॒जामि॑ । प्र॒जाभ्य॑ इति प्र-जा॒भ्यः ॥ वि॒श्वे॑ । त्वा । दे॒वाः ।
वै॒श्वान॒राः । समि॑ति । सृ॒जन्तु॑ । आ॒नुष्टु॒भेने॑त्या॒नु-स्तु॒भेन॑ । छन्द॑सा ।
अ॒ङ्गिर॒स्वत् ॥ रु॒द्राः । सं॒भृत्ये॑ति सं - भृत्य । पृथि॒वीम् । बृ॒हत् ।
ज्योतिः॑ । समि॑ति । ई॒धिरे ॥ तेषा॑म् । भा॒नुः । अज॑स्रः । इत् ।
शु॒क्रः । दे॒वेषु॑ । रोच॑ते ॥ स॒ꣳसृ॒ष्टामि॑ति सं - सृ॒ष्टाम् ।

वसु॑भिरि॒ति वसु॑ – भिः॑ । रु॒द्रैः॑ । धी॒रैः॑ । क॒र्म॒ण्याम् । मृ॒दम् ॥
हस्ता॑भ्याम् । मृ॒द्धीम् । कृ॒त्वा । सि॒नी॒वा॒ली । क॒रोतु॑ । 19 (50)

TS 4.1.5.3

तां ॥

सि॒नी॒वा॒ली सु॑क॒पर्दा सु॑कुरी॒रा स्वौ॑प॒शा ।
सा तु॑भ्यमदि॒ते मह॑ ओ॒खां द॑धातु ह॒स्तयोः॑ ॥
उ॒खां क॑रोतु श॒क्त्या बा॒हुभ्या॑ – मदि॒तिर्द्वि॒या ।
मा॒ता पु॒त्रं य॑थोप॒स्थे सा॑ऽग्निं बि॒भर्तु॑ गर्भ॒ आ ॥
म॒खस्य॑ शिरो॑ऽसि य॒ज्ञस्य॑ प॒दे स्थः॑ ।
वस॑वस्त्वा कृ॒ण्वन्तु॑ गा॒य॒त्रेण॑ छ॒न्दसा॑ ऽङ्गि॒रस्वत् पृ॑थि॒व्यसि॑
रु॒द्रास्त्वा कृ॒ण्वन्तु॑ त्रै॒ष्टुभे॑न छ॒न्दसा॑ ऽङ्गि॒रस्वद॑न्तरि॒क्षम॑स्या – [] 20

TS 4.1.5.3 - Padam

ताम् ॥ सि॒नी॒वा॒ली । सु॑क॒पर्दे॑ति सु – क॒पर्दा । सु॑कुरी॒रेति॑
सु – कुरी॒रा । स्वौ॑प॒शेति॑ सु – औ॒प॒शा ॥ सा । तु॑भ्यम् । अ॒दि॒ते ।
म॒हे । ए॒ति । उ॒खाम् । द॑धातु । ह॒स्तयोः॑ ॥ उ॒खाम् । क॑रोतु ।

श॒क्त्या॑ । बा॒हु॒भ्या॒मिति॑ बा॒हु – भ्या॒म् । अ॒दि॒तिः॑ । धि॒या ॥ मा॒ता ।
पु॒त्रम् । यथा॑ । उ॒प॒स्थ इत्यु॒प-स्थे॑ । सा । अ॒ग्नि॒म् । बि॒भर्तु॑ ।
ग॒र्भे॑ । आ ॥ म॒ख॒स्य॑ । शि॒रः॑ । अ॒सि॑ । य॒ज्ञ॒स्य॑ । प॒दे इति॑ । स्थः॑ ॥
व॒स॒वः॑ । त्वा । कृ॒ण्वन्तु॑ । गा॒य॒त्रेण॑ । छ॒न्द॒सा । अ॒ङ्गि॒र॒स्वत् ।
पृ॒थि॒वी । अ॒सि॑ । रु॒द्राः॑ । त्वा । कृ॒ण्वन्तु॑ । त्रै॒ष्टु॒भेन॑ । छ॒न्द॒सा ।
अ॒ङ्गि॒र॒स्वत् । अ॒न्त॒रि॒क्षम् । अ॒सि॑ । 20 (50)

TS 4.1.5.4

-दि॒त्यास्त्वा॑ कृ॒ण्वन्तु॑ जा॒ग॒तेन॑ छ॒न्द॒साऽङ्गि॒र॒स्वद् द्यौ॑र॒सि वि॒श्वे॑
त्वा दे॒वा वै॑श्वा॒न॒राः कृ॒ण्वन्त्वा॒नु॒ष्टु॒भेन॑ छ॒न्द॒सा-ऽङ्गि॒र॒स्वद्-दि॒शो॑ऽसि
ध्रु॒वाऽसि॑ **धारया॑** म॒यि प्र॒जाꣳ रा॒य॒स्पोषं॑ गौ॒प॒त्यꣳ सु॒वी॒र्यꣳ
स॒जा॒तान् । य॒ज॒मा॒नाया॑ऽदि॒त्यै रा॒स्नाऽस्य॑ दि॒ति॒स्ते बि॒लं गृ॒ह्णा॒तु पा॒ङ्केन॑
छ॒न्द॒सा ऽङ्गि॒र॒स्वत् ॥

कृ॒त्वा॒य सा॑ म॒ही॒मु॒खां मृ॒न्म॒यीं यो॑नि॒म॒ग्नये॑ ।
तां पु॒त्रेभ्यः॑ सं प्रा-()-य॒च्छ॒द॒दि॒तिः श्र॒प॒यानि॑ति ॥ 21

TS 4.1.5.4 - Padam

आ॒दि॒त्याः । त्वा॒ । कृ॒ण्व॒न्तु॒ । जा॒ग॒ते॒न॒ । छ॒न्द॒सा॒ । अ॒ङ्गि॒र॒स्व॒त् ।
द्यौः॑ । अ॒सि॒ । वि॒श्वे॑ । त्वा॒ । दे॒वाः॑ । वै॒श्वान॒राः॑ । कृ॒ण्व॒न्तु॒ ।
आ॒नु॒ष्टु॒भे॒ने॒त्या॒नु॒ – स्तु॒भे॒न॒ । छ॒न्द॒सा॒ । अ॒ङ्गि॒र॒स्व॒त् । दि॒शः॑ । अ॒सि॒ ।
ध्रु॒वा॒ । अ॒सि॒ । धा॒र॒य॒ । म॒यि॒ । प्र॒जा॒मि॒ति॒ प्र॒-जा॒म् । रा॒यः॑ । पो॒ष॒म् ।
गौ॒प॒त्य॒म् । सु॒वी॒र्य॒मि॒ति॒ सु॒ – वी॒र्य॒म् । स॒जा॒ता॒नि॒ति॒ स॒ – जा॒ता॒न् ।
य॒ज॒मा॒ना॒य॒ । अ॒दि॒त्यै॑ । रा॒स्ना॑ । अ॒सि॒ । अ॒दि॒तिः॑ । ते॒ । बि॒ल॒म् ।
गृ॒ह्णा॒तु॒ । पा॒ङ्के॒न॒ । छ॒न्द॒सा॒ । अ॒ङ्गि॒र॒स्व॒त् ॥ कृ॒त्वा॒य॒ । सा॒ । म॒ही॒म् ।
उ॒खा॒म् । मृ॒न्म॒यी॒मि॒ति॒ मृ॒त्-म॒यी॒म् । यो॒नि॒म् । अ॒ग्न॒यै॑ ॥ ता॒म् ।
पु॒त्रे॒भ्यः॑ । स॒म् । प्रे॒ति॒ () । अ॒य॒च्छ॒त् । अ॒दि॒तिः॑ । श्र॒प॒या॒न् ।
इ॒ति॑ ॥ 21 (54)

(मि॒त्रः – क॒रो – त्व॒न्त॒रि॒क्ष॒म॒सि – प्र – च॒त्वा॒रि॒ च) (A5)

TS 4.1.6.1

व॒स॒व॒स्त्वा॒ धू॒प॒य॒न्तु॒ गा॒य॒त्रे॒ण॒ छ॒न्द॒सा॒ ऽङ्गि॒र॒स्व॒द्-रु॒द्रा॒स्त्वा॒ धू॒प॒य॒न्तु॒
त्रै॒ष्टु॒भे॒न॒ छ॒न्द॒सा॒ ऽङ्गि॒र॒स्व॒दा॒दि॒त्या॒स्त्वा॒ धू॒प॒य॒न्तु॒ जा॒ग॒ते॒न॒

छन्दसा ऽङ्गिरस्वद् विश्वे त्वा देवा वैश्वानरा धूपयन्त्वानुष्टुभेन
छन्दसा ऽङ्गिरस्वदिन्द्रस्त्वा धूपयत्वङ्गिरस्वद् विष्णुस्त्वा
धूपयत्वङ्गिरस्वद् वरुणस्त्वा धूपयत्वङ्गिरस्वददितिस्त्वा देवी
विश्वदैव्यावती पृथिव्याः सधस्थे ऽङ्गिरस्वत् खनत्ववट
देवानां त्वा पत्नीर् – [] 22

TS 4.1.6.1 - Padam

वसवः । त्वा । धूपयन्तु । गायत्रेण । छन्दसा । अङ्गिरस्वत् ।
रुद्राः । त्वा । धूपयन्तु । त्रैष्टुभेन । छन्दसा । अङ्गिरस्वत् ।
आदित्याः । त्वा । धूपयन्तु । जागतेन । छन्दसा । अङ्गिरस्वत् ।
विश्वे । त्वा । देवाः । वैश्वानराः । धूपयन्तु ।
आनुष्टुभेनेत्यानु – स्तुभेन । छन्दसा । अङ्गिरस्वत् । इन्द्रः । त्वा ।
धूपयतु । अङ्गिरस्वत् । विष्णुः । त्वा । धूपयतु । अङ्गिरस्वत् ।
वरुणः । त्वा । धूपयतु । अङ्गिरस्वत् । अदितिः । त्वा । देवी ।
विश्वदैव्यावतीति विश्वदैव्य – वती । पृथिव्याः ।

स॒ध॒स्थ॒ इति॑ स॒ध – स्थे॒ । अ॒ङ्गि॒र॒स्वत् । ख॒न॒तु॒ । अ॒व॒ट॒ ।

दे॒वा॒ना॒म् । त्वा॒ । प॒त्नीः॑ । 22 (50)

TS 4.1.6.2

दे॒वीर् वि॒श्व॒दे॒व्या॒वतीः॑ पृ॒थि॒व्याः स॒ध॒स्थे॒ ऽङ्गि॒र॒स्वद्-द॑ध॒तू॒खे
धि॒ष॒णा॒स्त्वा दे॒वीर्वि॒श्व॒दे॒व्या॒वतीः॑ पृ॒थि॒व्याः स॒ध॒स्थे॒-ऽङ्गि॒र॒स्व-
द॒भी॒न्ध॒ता॒मु॒खे ग्ना॑ स्त्वा दे॒वीर्वि॒श्व॒दे॒व्या॒वतीः॑ पृ॒थि॒व्याः
स॒ध॒स्थे॒ ऽङ्गि॒र॒स्व-च्छ॑प॒य॒न्तू॒खे व॒रू॒त्र॒यो ज॑न॒य॒स्त्वा
दे॒वीर्वि॒श्व॒दे॒व्या॒वतीः॑ पृ॒थि॒व्याः स॒ध॒स्थे॒ ऽङ्गि॒र॒स्वत् प॑च॒न्तू॒खे ।
मि॒त्रै॒ता॒मु॒खां प॑चै॒षा मा॑ भे॒दि ।
ए॒तां ते॒ परि॑ द॒दाम्य॑भि॒त्त्यै ॥

अ॒भी॒मां – [] 23

TS 4.1.6.2 - Padam

दे॒वीः । वि॒श्व॒दे॒व्या॒वती॑रि॒ति वि॒श्व॒दे॒व्य – व॒तीः॑ । पृ॒थि॒व्याः ।
स॒ध॒स्थ॒ इति॑ स॒ध – स्थे॒ । अ॒ङ्गि॒र॒स्वत् । द॒ध॒तु॒ । उ॒खे । धि॒ष॒णाः॑ ।
त्वा॒ । दे॒वीः । वि॒श्व॒दे॒व्या॒वती॑रि॒ति वि॒श्व॒दे॒व्य – व॒तीः॑ । पृ॒थि॒व्याः ।

स॒ध॒स्थ॒ इति॑ स॒ध – स्थे॑ । अ॒ङ्गिर॑स्वत् । अ॒भी॒ति॑ । इ॒न्ध॒ता॒म् ।
उ॒खे॒ । ग्नाः॑ । त्वा॒ । दे॒वीः॑ । वि॒श्व॒दे॒व्या॒वती॑रिति॑ वि॒श्व॒दे॒व्य – व॒तीः॑ ।
पृ॒थि॒व्याः॑ । स॒ध॒स्थ॒ इति॑ स॒ध – स्थे॑ । अ॒ङ्गिर॑स्वत् । श्र॒प॒य॒न्तु॑ ।
उ॒खे॒ । व॒रू॒त्र॒यः॑ । ज॒न॒यः॑ । त्वा॒ । दे॒वीः॑ । वि॒श्व॒दे॒व्या॒वती॑रिति॑
वि॒श्व॒दे॒व्य – व॒तीः॑ । पृ॒थि॒व्याः॑ । स॒ध॒स्थ॒ इति॑ स॒ध – स्थे॑ ।
अ॒ङ्गिर॑स्वत् । प॒च॒न्तु॑ । उ॒खे॒ ॥ मि॒त्र॑ । ए॒ता॒म् । उ॒खा॒म् । प॒च॑ ।
ए॒षा । मा॑ । भे॒दि ॥ ए॒ता॒म् । ते॒ । प॒री॒ति॑ । द॒दा॒मि॑ । अ॒भि॒त्यै॑ ॥
अ॒भी॒ति॑ । इ॒मा॒म् । 23 (50)

TS 4.1.6.3

म॒हि॒ना॒ दि॒वं मि॒त्रो ब॑भूव स॒प्र॒थाः॑ ।
उ॒त श्र॑वसा पृ॒थि॒वीं ॥
मि॒त्र॒स्य॑ च॒र्ष॒णी॒धृ॒तः॑ श्र॒वो दे॒व॒स्य॑ सा॒न॒सिं॑ ।
द्यु॒म्नं॑ चि॒त्र॒श्र॑वस्त॒मं ॥
दे॒व॒स्त्वा स॒वि॒तो॒द्व॒प॒तु॑ सु॒पा॒णिः॑ स्व॒ङ्गु॒रिः॑ ।
सु॒बा॒हु॒रु॒त श॑क्त्या ॥

अप॒द्य॒मा॒ना पृ॒थि॒व्या॒शा दि॒श आ पृ॒ण ।

उत्ति॑ष्ठ बृ॒हती॑ भवो॒र्द्ध्वा तिष्ठ॑ ध्रु॒वा त्वं ॥

वस॑वस्त्वाऽऽ च्छृ॒न्दन्तु॑ गाय॒त्रेण॑ छन्द॒सा ऽङ्गि॒रस्वद् रु॒द्रास्त्वाऽऽ
च्छृ॒न्दन्तु॑ () त्रै॒ष्टुभे॒न छन्द॒साऽङ्गि॒रस्व॒-दादि॒त्यास्त्वाऽऽ च्छृ॒न्दन्तु॑
जाग॑तेन छन्द॒सा ऽङ्गि॒रस्वद्-वि॒श्वे॑ त्वा दे॒वा वै॒श्वान॒रा आ
च्छृ॒न्दन्त्वा॒नुष्टु॒भेन॑ छन्द॒सा ऽङ्गि॒रस्वत् ॥ 24

TS 4.1.6.3 - Padam

महि॑ना । दि॒वम् । मि॒त्रः । ब॒भूव॑ । सप्र॒था इति॑ स – प्र॒थाः ॥ उ॒त ।
श्रव॑सा । पृ॒थि॒वीम् ॥ मि॒त्रस्य॑ । च॒र्ष॒णीधृ॒त इति॑ च॒र्ष॒णि – धृ॒तः ।
श्रवः॑ । दे॒वस्य॑ । सा॒न॒सिम् ॥ द्यु॒म्नम् । चि॒त्रश्रव॑स्तममि॒ति
चि॒त्रश्रवः॑ – त॒मम् ॥ दे॒वः । त्वा । स॒वि॒ता । उ॒दि॒ति । व॒प॒तु ।
सु॒पा॒णि॒रिति॑ सु – पा॒णिः । स्व॒ङ्गु॒रिति॑ सु – अ॒ङ्गु॒रिः ॥ सु॒बा॒हु॒रिति॑
सु – बा॒हुः । उ॒त । श॒क्त्या ॥ अप॒द्य॒मा॒ना । पृ॒थि॒वि । आ॒शाः ।
दि॒शः । ए॒ति । पृ॒ण ॥ उ॒दि॒ति । तिष्ठ॑ । बृ॒हती॑ । भ॒व । ऊ॒र्द्ध्वा ।
तिष्ठ॑ । ध्रु॒वा । त्वम् ॥ वस॑वः । त्वा । ए॒ति । छृ॒न्दन्तु॑ । गा॒य॒त्रेण॑ ।

छन्दसा । अङ्गिरस्वत् । रुद्राः । त्वा । एति । छृन्दन्तु () । त्रैष्टुभेन ।
छन्दसा । अङ्गिरस्वत् । आदित्याः । त्वा । एति । छृन्दन्तु ।
जागतेन । छन्दसा । अङ्गिरस्वत् । विश्वे । त्वा । देवाः । वैश्वानराः ।
एति । छृन्दन्तु । आनुष्टुभेनेत्यानु – स्तुभेन । छन्दसा ।

अङ्गिरस्वत् ॥ 24 (69) (पत्नी – रिमाꣳ – रुद्रास्त्वाꣳ छृन्दन्त्वे –
कान्नविꣳशतिश्च) (A6)

TS 4.1.7.1

समास्त्वाꣳग्न ऋतवो वर्द्धयन्तु सँवथ्सरा ऋषयो यानि सत्या ।
सं दिव्येन दीदिहि रोचनेन विश्वा आ भाहि प्रदिशः पृथिव्याः ॥
सं चेद्ध्यस्वाꣳग्ने प्र च बोधयैनमुच्च तिष्ठ महते सौभगाय ।
मा च रिषदुपसत्ता ते अग्ने ब्रह्माणस्ते यशसः सन्तु माꣳन्ये ॥
त्वामग्ने वृणते ब्राह्मणा इमे शिवो अग्ने – [] 25

TS 4.1.7.1 - Padam

समाः । त्वा । अग्ने । ऋतवः । वर्द्धयन्तु । सँवथ्सरा इति
सं-वथ्सराः । ऋषयः । यानि । सत्या ॥ समिति । दिव्येन । दीदिहि ।
रोचनेन । विश्वाः । एति । भाहि । प्रदिश इति प्र – दिशः ।

पृ॒थि॒व्याः ॥ स॒मि॒ति । च । इ॒द्ध्य॒स्व । अ॒ग्ने । प्रे॒ति । च । बो॒धय ।
ए॒नम् । उ॒दि॒ति । च । ति॒ष्ठ । म॒ह॒ते । सौ॒भ॒गाय ॥ मा । च । रि॒षत् ।
उ॒प॒स॒त्तेत्यु॒प – स॒त्ता । ते । अ॒ग्ने । ब्र॒ह्मा॒णः । ते । य॒श॒सः । स॒न्तु ।
मा । अ॒न्ये ॥ त्वा॒म् । अ॒ग्ने । वृ॒ण॒ते । ब्रा॒ह्म॒णाः । इ॒मे । शि॒वः ।

अ॒ग्ने । 25 (50)

TS 4.1.7.2

सँ॒वर॒णे भ॒वा नः ।

स॒प॒त्न॒हा नो॑ अ॒भि॒मा॒ति॒जि॒च्च स्वे॑ ग॒ये जा॒गृ॒ह्य॒प्र॒यु॒च्छन् ॥
इ॒है॒वा॒ग्ने अ॒धि धा॒र॒या र॒यिं मा॒ त्वा नि॒ क्रन् पूर्व॑चि॒तो नि॒का॒रि॒णः ।
क्ष॒त्र॒म॒ग्ने सु॒य॒म॒म॒स्तु तु॒भ्य॒मु॒प॒स॒त्ता व॒र्द्ध॒तां ते॒ अ॒नि॒ष्टृ॒तः ॥
क्ष॒त्रे॒णा॒ग्ने स्वा॒युः स॒ र॒भ॒स्व मि॒त्रे॒णा॒ग्ने मि॒त्र॒धे॒ये य॒त॒स्व ।
स॒जा॒ता॒नां म॒द्ध्य॒म॒स्था ए॒धि रा॒ज्ञा॒म॒ग्ने वि॒ह॒व्यो दी॒दि॒ही॒ह ॥
अ॒ति – [] 26

TS 4.1.7.2 - Padam

सँवरण॑ इति॑ सं – वरणे॑ । भव॑ । नः॑ ॥ सप॑न्नहेति॑ सप॑न्न-हा । नः॑ ।
अभि॑मातिजिदि॑त्यभि॑माति – जि॒त् । च॒ । स्वे॑ । ग॒यै॑ । जा॒गृ॒हि॑ ।
अप्र॑युच्छन्नि॒त्यप्र॑ – यु॒च्छन्॑ ॥ इ॒ह । ए॒व । अ॒ग्ने॑ । अधी॑ति । धा॒रय॑ ।
रयि॑म् । मा । त्वा॑ । नी॒ति । क्र॒न् । पू॒र्वचि॑त इति॑ पू॒र्व – चि॑तः ।
नि॒का॒रि॒ण इति॑ नि – का॒रि॒णः ॥ क्ष॒त्रम् । अ॒ग्ने॑ । सु॒यम॑मि॒ति
सु – यम॑म् । अ॒स्तु । तु॒भ्यम् । उ॒प॒स॒त्तेत्यु॑प-स॒त्ता । व॒र्द्ध॒ताम् ।
ते । अ॒नि॒ष्ट॒तः ॥ क्ष॒त्रेण॑ । अ॒ग्ने॑ । स्वा॒यु॒रिति॑ सु – आ॒युः । स॒मि॒ति ।
र॒भ॒स्व । मि॒त्रेण॑ । अ॒ग्ने॑ । मि॒त्र॒धेय॑ इति॑ मि॒त्र – धे॒यै॑ । य॒त॒स्व ॥
स॒जा॒ता॒नामि॑ति॒ स – जा॒ता॒नाम् । म॒द्ध्य॒म॒स्था इति॑ म॒द्ध्य॒म-स्थाः॑ ।
ए॒धि । रा॒ज्ञाम् । अ॒ग्ने॑ । वि॒ह॒व्य इति॑ वि – ह॒व्यः । दी॒दि॒हि॑ । इ॒ह ॥
अ॒ती॒ति । 26 (50)

TS 4.1.7.3

नि॒हो॑ अ॒ति॒ सि॒धो॑ ऽत्य॑चि॒त्ति-म॑त्य॒रा॒ति॒म॒ग्ने॑ ।
वि॒श्वा॑ ह्य॒ग्ने॑ दु॒रि॒ता॒ स॒ह॒स्वा॒था॒स्मभ्य॑ꣳ स॒ह॒वी॒राꣳ र॒यि॒न्दाः॑ ॥
अ॒ना॒धृ॒ष्यो॑ जा॒त॒वे॒दा॒ अ॒नि॒ष्ट॒तो॑ वि॒रा॒ड॒ग्ने॑ क्ष॒त्र॒भृद् दी॒दि॒ही॒ह ।

वि॒श्वा आ॒शाः प्र॒मुञ्चन् मानु॑षीर्भियः शि॒वाभि॒र॒द्य परि पा॒हि नो वृ॒धे ॥
बृ॒हस्प॑ते स॒वित॒र्बो॒धयै॑न् सञ्शितं चि॒त् सन्त॒राञ् सञ् शि॒शाधि॑ ।
व॒र्द्धयै॑नं म॒हते सौ॒भगा॑य – [] 27

TS 4.1.7.3 - Padam

नि॒हः । अ॒तीति॑ । सि॒धः । अ॒तीति॑ । अचि॑त्तिम् । अ॒तीति॑ । अ॒राति॑म् ।
अ॒ग्ने ॥ वि॒श्वा । हि । अ॒ग्ने । दु॒रिते॑ति दुः – इ॒ता । स॒हस्व॑ ।
अथ॑ । अ॒स्मभ्य॑मि॒त्यस्म॑ – भ्यम् । स॒हवी॑रमि॒ति स॒ह – वी॒राम् ।
रयि॑म् । दाः ॥ अ॒नाधृ॑ष्य इ॒त्यना॑ – धृ॒ष्यः । जा॒तवे॑दा इति
जा॒त – वे॒दाः । अ॒निष्टृ॑तः । वि॒राडि॑ति वि – राट् । अ॒ग्ने ।
क्ष॒त्रभृ॑दि॒ति क्ष॒त्र – भृ॑त् । दी॒दि॒हि । इ॒ह ॥ वि॒श्वाः । आ॒शाः ।
प्र॒मुञ्च॑न्निति प्र – मुञ्चन् । मा॒नुषीः । भि॒यः । शि॒वाभिः॑ । अ॒द्य ।
परी॑ति । पा॒हि । नः । वृ॒धे ॥ बृ॒हस्प॑ते । स॒वितः॑ । बो॒धय॑ । ए॒नम् ।
सञ्शि॑तमि॒ति सं – शि॒तम् । चि॒त् । सन्त॒रामि॑ति सं – त॒राम् ।
समि॑ति । शि॒शाधि॑ ॥ व॒र्द्धय॑ । ए॒नम् । म॒हते । सौ॒भगा॑य । 27 (50)

TS 4.1.7.4

वि॒श्व ए॒न॒म॒नु॒ म॒द॒न्तु॒ दे॒वाः ॥

अ॒मु॒त्र॒भू॒या॒द॒ध॒ यद्-य॒म॒स्य॒ बृ॒ह॒स्प॒ते॒ अ॒भि॒श॒स्ते-र॒मु॒ञ्चः ।

प्र॒त्यौ॒ह॒ता-म॒श्वि॒ना॒ मृ॒त्यु॒म॒स्माद् दे॒वा॒ना-म॒ग्ने॒ भि॒ष॒जा॒ श॒ची॒भिः ॥

उद्-व॒यं॒ त॒म॒स॒स्परि॒ प॒श्य॒न्तो॒ ज्यो॒ति॒रु॒त्तरं॑ ।

दे॒वं दे॒व॒त्रा॒ सूर्य॑म॒ग॒न्म॒ ज्यो॒ति॒रु॒त्त॒मं ॥ 28

TS 4.1.7.4 - Padam

वि॒श्वे॑ । ए॒न॒म् । अ॒न्वि॒ति॑ । म॒द॒न्तु॑ । दे॒वाः ॥

अ॒मु॒त्र॒भू॒या॒दि॒त्य॒मु॒त्र - भू॒या॒त् । अ॒ध॒ । य॒त् । य॒म॒स्य॑ । बृ॒ह॒स्प॒ते॑ ।

अ॒भि॒श॒स्ते॒रि॒त्य॒भि - श॒स्तेः॑ । अ॒मु॒ञ्चः॑ ॥ प्र॒ती॒ति॑ । औ॒ह॒ता॒म् ।

अ॒श्वि॒ना॑ । मृ॒त्यु॒म् । अ॒स्मा॒त् । दे॒वा॒ना॒म् । अ॒ग्ने॑ । भि॒ष॒जा॑ ।

श॒ची॒भि॒रि॒ति॒ श॒चि॑ - भिः॑ ॥ उ॒दि॒ति॑ । व॒य॒म् । त॒म॒सः॑ । प॒री॒ति॑ ।

प॒श्य॒न्तः॑ । ज्यो॒तिः॑ । उ॒त्त॒र॒मि॒त्यु॒त् - त॒र॒म् ॥

दे॒व॒म् । दे॒व॒त्रे॒ति॑ दे॒व - त्रा॑ । सूर्य॑म् । अ॒ग॒न्म॑ । ज्यो॒तिः॑ ।

उ॒त्त॒म॒मि॒त्यु॒त् - त॒म॒म् ॥ 28 (34) (इ॒मे॒ शि॒वो॒ अ॒ग्ने॒ - ऽति॒ -

सौ॒भ॒गा॒य - च॒तु॒स्त्रि॒ंश॒च्च) (A7)

TS 4.1.8.1

ऊ॒र्द्ध्वा अस्य॑ समि॒धो भवन्त्यूर्द्ध्वा शु॒क्रा शो॒ची॒ ऽष्य॒ग्नेः ।

द्यु॒मत्त॑मा सु॒प्रती॑कस्य सू॒नोः ॥

तनू॒नपा॒दसु॒रो वि॒श्ववे॑दा दे॒वो दे॒वेषु॑ दे॒वः ।

पथ॑ आ॒ऽनक्ति॑ म॒ध्वा घृ॒तेन॑ ॥

म॒ध्वा य॒ज्ञं नक्ष॑से प्री॒णानो॑ नरा॒श॒ऽसौ अ॒ग्ने ।

सु॒कृद्-दे॒वः स॒विता वि॒श्ववा॑रः ॥

अच्छा॒यमे॒ति श॒वसा॑ घृ॒तेने॑डा॒नो वह्नि॑र्नम॒सा ।

अ॒ग्नि॒ ऽसु॒चो अ॒ध्वरे॑षु प्र॒यथ्सु॑ ॥

स यक्ष॑दस्य म॒हिमा॑नम॒ग्नेः स - [] 29

TS 4.1.8.1 - Padam

ऊ॒र्द्ध्वाः । अ॒स्य । स॒मिध॑ इति सं-इ॒धः । भ॒वन्ति॑ । ऊ॒र्द्ध्वा ।

शु॒क्रा । शो॒ची॒ ऽषि॑ । अ॒ग्नेः ॥ द्यु॒मत्त॑मेति द्यु॒मत् - त॒मा ।

सु॒प्रती॑क॒स्येति॑ सु - प्र॒तीक॑स्य । सू॒नोः ॥ तनू॒नपा॒दिति॑ तनू॒-नपा॑त् ॥

अ॒सुरः॑ । वि॒श्ववे॑दा इति वि॒श्व-वे॑दाः । दे॒वः । दे॒वेषु॑ । दे॒वः ॥ प॒थः ।

ए॒ति । अ॒न॒क्ति॒ । म॒द॒ध्वा॒ । घृ॒तेन॑ ॥ म॒द॒ध्वा॒ । य॒ज्ञम् । न॒क्ष॒से ।
प्री॒णानः॑ । न॒रा॒श॒सः॑ । अ॒ग्ने ॥ सु॒कृ॒दि॒ति॒ सु – कृ॒त् । दे॒वः ।
स॒वि॒ता । वि॒श्व॒वा॒र इति॑ वि॒श्व – वा॒रः ॥ अ॒च्छ । अ॒यम् । ए॒ति ।
श॒व॒सा । घृ॒तेन॑ । ई॒डा॒नः । व॒हिः । न॒म॒सा ॥ अ॒ग्निम् । सु॒चः ।
अ॒ध्व॒रेषु॑ । प्र॒य॒त्स्वि॒ति॒ प्र॒यत् – सु ॥ सः । य॒क्ष॒त् । अ॒स्य ।
म॒हि॒मा॒नम् । अ॒ग्नेः । सः । 29 (50)

TS 4.1.8.2

ई॒ म॒न्द्रा॒सु प्र॒य॒सः ।
व॒सु॒श्चेति॑ष्ठो व॒सु॒धा॒त॒मश्च॑ ॥
द्वा॒रो दे॒वी॒र॒न्व॒स्य वि॒श्वे॑ व्र॒ता द॑द॒न्ते अ॒ग्नेः ।
उ॒रु॒व्य॒च॒सो धा॒म्ना प॑त्य॒मा॒नाः ॥
ते अ॒स्य यो॑ष॒णे दि॒व्ये न॑ यो॒ना॒वु॒षा॒सान॑क्ता ।
इ॒मं य॑ज्ञ॒म॒व॒ता-म॑ध्व॒रं नः॑ ॥
दै॒व्या हो॒ता॒रा॒वूर्ध्व॑-म॒ध्व॒रं नो॒ऽग्ने॒र्जि॒ह्वा॒म॒भि गृ॑णी॒तं ।

कृ॒णु॒तं नः॑ स्वि॒ष्टिं ॥

ति॒स्रो दे॒वीर्ब॒र्हिरे॒दꣳ स॒दन्ति॒वडा॑ सर॒स्वती॑ – [] 30

TS 4.1.8.2 - Padam

ई॒म् । म॒न्द्रा॒सु । प्र॒यसः॑ ॥ व॒सुः । चे॒तिष्ठः॑ । व॒सुधा॑त॒म इति॑
व॒सु – धा॑त॒मः । च ॥ द्वा॒रः । दे॒वीः । अ॒न्वि॒ति । अ॒स्य । वि॒श्वे ॥
व्र॒ता । द॒दन्ते॑ । अ॒ग्नेः ॥ उ॒रुव्य॑च॒स इत्यु॑रु – व्य॒चसः॑ । धा॒म्ना ॥
प॒त्यमा॑नाः ॥ ते इति॑ । अ॒स्य । योष॑णे इति॑ । दि॒व्ये इति॑ । न । यो॒नौ ॥
उषा॑सा॒नक्ता ॥ इ॒मम् । य॒ज्ञम् । अ॒वता॑म् । अ॒ध्व॒रम् । नः ॥ दै॒व्या ॥
हो॒ता॒रौ । ऊ॒र्ध्वम् । अ॒ध्व॒रम् । नः । अ॒ग्नेः । जि॒ह्वा॒म् । अ॒भी॒ति ।
गृ॒णी॒तम् ॥ कृ॒णु॒तम् । नः । स्वि॒ष्टि॒मि॒ति सु॒-इ॒ष्टिम् ॥ ति॒स्रः । दे॒वीः ।
ब॒र्हिः । ए॒ति । इ॒दम् । स॒दन्तु॑ । इ॒डा । सर॒स्वती॑ । 30 (50)

TS 4.1.8.3

भा॒रती॑ ।

म॒ही गृ॒णा॒ना ॥

तन्न॑स्तु॒रीप॒मद्भु॑तं पु॒रुक्षु॑ त्व॒ष्टा सु॒वी॒रं ॥

रा॒य॒स्पोषं॑ वि॒ ष्य॒तु॒ ना॒भि॒म॒स्मे ॥

व॒न॒स्प॒तेऽव॑ सृ॒जा र॒रा॒ण॒स्त्म॒ना दे॒वेषु॑ ।

अ॒ग्नि॒र्ह॒व्यं श॒मि॒ता सू॒द॒याति॑ ॥

अ॒ग्ने स्वा॒हा कृ॒णु॒हि जा॒तवे॒द इन्द्रा॑य ह॒व्यं ।

वि॒श्वे दे॒वा ह॒वि॒रि॒दं जु॒षन्तां॑ ॥

हि॒र॒ण्य॒ग॒र्भः स॒म॒व॒र्त॒ताग्रे॑ भू॒तस्य॑ जा॒तः प॒ति॒रेक॑ आसीत् ।

स दा॒धार पृ॒थि॒वीं द्या – [] 31

TS 4.1.8.3 - Padam

भा॒रती॑ ॥ म॒ही । गृ॒णा॒ना ॥ तत् । नः॑ । तु॒री॒प॒म् । अ॒द्भु॒त॒म् । पु॒रु॒क्षु ।

त्व॒ष्टा । सु॒वी॒र॒मि॒ति सु॑ – वी॒र॒म् ॥ रा॒यः । पो॒ष॒म् । वी॒ति॑ । स्य॒तु॒ ।

ना॒भि॒म् । अ॒स्मे इति॑ ॥ व॒न॒स्प॒ते । अ॒वे॒ति॑ । सृ॒ज॒ । र॒रा॒णः । त्म॒ना॑ ।

दे॒वेषु॑ ॥ अ॒ग्निः । ह॒व्य॒म् । श॒मि॒ता । सू॒द॒या॒ति॑ ॥ अ॒ग्ने॑ । स्वा॒हा ।

कृ॒णु॒हि । जा॒तवे॒द इति॑ जा॒त – वे॒दः । इन्द्रा॑य । ह॒व्य॒म् ॥ वि॒श्वे॑ ।

दे॒वाः । ह॒विः । इ॒द॒म् । जु॒ष॒न्ता॒म् ॥ हि॒र॒ण्य॒ग॒र्भ इति॑ हि॒र॒ण्य॒ग॒र्भः ।

स॒मि॒ति॒ । अ॒व॒र्त॒त॒ । अ॒ग्रे॑ । भू॒त॒स्य॑ । जा॒तः॑ । प॒तिः॑ । ए॒कः॑ ।

आ॒सी॒त् ॥ सः॑ । दा॒धा॒र॒ । पृ॒थि॒वी॒म् । द्या॒म् । 31 (50)

TS 4.1.8.4

–मु॒ते॒मां॑ क॒स्मै॑ दे॒वाय॑ ह॒विषा॑ वि॒धेम॑ ॥

यः प्रा॒ण॒तो॑ नि॒मिष॑तो॒ महि॒त्वै॒क॒ इ॒द्–रा॒जा॒ जग॑तो॒ ब॒भू॒व॑ ।

य ई॒शे॑ अ॒स्य॑ द्वि॒प॒दश्च॑तु॒ष्प॒दः॑ क॒स्मै॑ दे॒वाय॑ ह॒विषा॑ वि॒धेम॑ ॥

य आ॒त्म॒दा॑ ब॒ल॒दा॑ य॒स्य॑ वि॒श्व॑ उ॒पा॒स॒ते॑ प्र॒शिषं॑ य॒स्य॑ दे॒वाः॑ ।

य॒स्य॑ छा॒याऽमृ॑तं॒ य॒स्य॑ मृ॒त्युः॑ क॒स्मै॑ दे॒वाय॑ ह॒विषा॑ वि॒धेम॑ ॥

य॒स्ये॒मे॒ हि॒म॒व॒न्तो॑ महि॒त्वा॑ य॒स्य॑ स॒मु॒द्रं र॒स॒या॑ स॒हा – [] 32

TS 4.1.8.4 - Padam

उ॒त॒ । इ॒मा॒म् । क॒स्मै॑ । दे॒वाय॑ । ह॒विषा॑ । वि॒धेम॑ ॥ यः॑ । प्रा॒ण॒त॒ इति॑

प्र – अ॒न॒तः॑ । नि॒मिष॑त॒ इति॑ नि – मि॒ष॒तः॑ । महि॒त्वे॒ति॑ महि – त्वा ।

ए॒कः॑ । इ॒त् । रा॒जा॑ । जग॑तः॒ ब॒भू॒व॑ ॥ यः॑ । ई॒शे॑ । अ॒स्य॑ ।

द्वि॒प॒द॒ इति॑ द्वि – प॒दः॑ । च॒तु॒ष्प॒द॒ इति॑ च॒तुः॑ – प॒दः॑ । क॒स्मै॑ ।

दे॒वाय॑ । ह॒विषा॑ । वि॒धेम॑ ॥ यः । आ॒त्म॒दा इ॒त्यात्म॑-दाः । ब॒ल॒दा इति॑
ब॒ल-दाः॑ । य॒स्य॑ । वि॒श्वे॑ । उ॒पा॒स॒त इत्यु॑प - आ॒स॒ते । प्र॒शिष॑मि॒ति
प्र - शि॒षम् । य॒स्य॑ । दे॒वाः ॥ य॒स्य॑ । छा॒या । अ॒मृत॑म् । य॒स्य॑ ।
मृ॒त्युः । क॒स्मै॑ । दे॒वाय॑ । ह॒विषा॑ । वि॒धेम॑ ॥ य॒स्य॑ । इ॒मे ।
हि॒म॒व॒न्त इति॑ हि॒म - व॒न्तः । म॒हि॒त्वेति॑ म॒हि - त्वा । य॒स्य॑ ।
स॒मु॒द्रम् । र॒स॒या । स॒ह । 32 (50)

TS 4.1.8.5

-ऽऽहुः ।

य॒स्ये॒माः प्र॒दि॒शो य॒स्य॑ बा॒हू क॒स्मै॑ दे॒वाय॑ ह॒विषा॑ वि॒धेम॑ ॥
यं क्र॒न्द॒सी॒ अव॑सा तस्त॒भाने॑ अ॒भ्यै॒क्षेतां॑ म॒न॒सा रे॒ज॒माने॑ ।
यत्रा॑ ऽधि॒ सूर॑ उ॒दि॒तौ व्येति॑ क॒स्मै॑ दे॒वाय॑ ह॒विषा॑ वि॒धेम॑ ॥
ये॒न द्यौ॒रु॒ग्रा पृ॒थि॒वी च॑ दृ॒ढे ये॒न सु॒वः स्त॒भितं॑ ये॒न ना॒कः ।
यो अ॒न्त॒रि॒क्षे र॒ज॒सो वि॒मानः॑ क॒स्मै॑ दे॒वाय॑ ह॒विषा॑ वि॒धेम॑ ॥
आपो॑ ह॒ यन्म॑ह॒तीर् वि॒श्व - [] 33

TS 4.1.8.5 - Padam

आहुः॑ ॥ यस्य॑ । इ॒माः । प्र॒दि॒श इति॑ प्र-दि॒शः । यस्य॑ । बा॒हू इति॑ ।
कस्मै॑ ॥ दे॒वाय॑ । ह॒विषा॑ । वि॒धेम ॥ यम् । क्र॒न्द॒सी इति॑ । अ॒व॒सा ।
तस्त॒भाने॑ इति॑ । अ॒भ्यै॒क्षेता॑मित्य॒भि - ऐ॒क्षेतां॑ । म॒न॒सा । रेज॑माने
इति॑ ॥ यत्र॑ । अधी॑ति । सूरः॑ । उ॒दि॒ता॒वि॒त्युत् - इ॒तौ । व्येती॑ति
वि - ए॒ति । कस्मै॑ ॥ दे॒वाय॑ । ह॒विषा॑ । वि॒धेम ॥ येन॑ । द्यौः । उ॒ग्रा ।
पृ॒थि॒वी । च । दृ॒ढे इति॑ । येन॑ । सु॒वः । स्त॒भित॑म् । येन॑ । ना॒कः ॥
यः । अ॒न्तरि॑क्षे । रज॑सः । वि॒मान इति॑ वि-मानः । कस्मै॑ ॥ दे॒वाय॑ ।
ह॒विषा॑ । वि॒धेम ॥ आ॒पः । ह । यत् । म॒हतीः॑ । विश्व॑म् । 33 (50)

TS 4.1.8.6

-मा॒यन् दक्षं॑ दधा॒ना ज॒नय॑न्तीर॒ग्निं ।
ततो॑ दे॒वानां॑ नि॒र्वर्त॑तासु॒रेकः॑ कस्मै॑ दे॒वाय॑ ह॒विषा॑ वि॒धेम ॥
यश्चि॒दापो॑ म॒हिना॑ प॒र्यप॑श्यद्-दक्षं॑ दधा॒ना ज॒नय॑न्तीर॒ग्निं ।
यो दे॒वेष्व॑धि दे॒व एक॑ आसीत् कस्मै॑ दे॒वाय॑ ह॒विषा॑ वि॒धेम ॥ 34

TS 4.1.8.6 - Padam

आ॒यन् । दक्ष॑म् । दधा॑नाः । जन॑यन्तीः । अ॒ग्निम् ॥ ततः॑ । दे॒वाना॑म् ।
नि॒रिति॑ । अ॒वर्त॑त । अ॒सुः । ए॒कः । कस्मै॑ । दे॒वाय॑ । ह॒विषा॑ । वि॒धेम ॥
यः । चि॒त् । आ॒पः । म॒हिना॑ । प॒र्यप॑श्यदि॒ति परि॑-अप॑श्यत् । दक्ष॑म् ।
दधा॑नाः । जन॑यन्तीः । अ॒ग्निम् ॥ यः । दे॒वेषु॑ । अधी॑ति । दे॒वः ।
ए॒कः । आसी॑त् । कस्मै॑ । दे॒वाय॑ । ह॒विषा॑ । वि॒धेम ॥ 34 (34)

(अ॒ग्नेः स - सर॑स्वती - द्या॑ - स॒ह - विश्वं॑ -
चतु॑स्त्रिंशच्च) (A8)

Special Korvai for Anuvaakam 29 to 34

(ऊ॒र्ध्वा - यः प्रा॑णतो - य आ॒त्मदा॑ - य॒स्येमे॑ - यङ्क्र॑न्दसी -
येन॑ द्यौ- रा॒पो ह॒ यत् - ततो॑ दे॒वानां॑ - य॒श्चिदा॑पो - यो दे॒वेषु॑ -
नव॑)

TS 4.1.9.1

आ॒कूति॑म॒ग्निं प्र॑युज॒ स्वाहा॑ म॒नो मे॒धाम॒ग्निं प्र॑युज॒ स्वाहा॑
चि॒तं वि॒ज्ञात॑म॒ग्निं प्र॑युज॒ स्वाहा॑ वा॒चो वि॒धृति॑म॒ग्निं प्र॑युज॒
स्वाहा॑ प्र॒जाप॑तये॒ मन॑वे॒ स्वाहा॑ऽग्नये॒ वैश्वा॑न॒राय॑ स्वाहा॒ विश्वे॑ दे॒वस्य॑

ने॒तु॒र्मर्तो॑ वृ॒णीत॑ स॒ख्यं वि॒श्वे रा॒य इ॒षुद्ध्य॑सि द्यु॒म्नं वृ॒णीत॑ पु॒ष्यसे॒
स्वाहा॑ मा सु भि॒त्था मा सु रि॒षो दृ॒ह॒स्व वी॒डय॑स्व सु ।

अ॒ंब धृ॒ष्णु वी॒रय॑स्वा – [] 35

TS 4.1.9.1 - Padam

आकू॑ति॒मित्या॑ – कू॒तिम् । अ॒ग्निम् । प्र॒युज॑मि॒ति प्र – यु॒जम् ।
स्वाहा॑ । म॒नः । मे॒धाम् । अ॒ग्निम् । प्र॒युज॑मि॒ति प्र-यु॒जम् । स्वाहा॑ ।
चि॒त्तम् । वि॒ज्ञा॑त॒मि॒ति वि – ज्ञा॑तम् । अ॒ग्निम् ।
प्र॒युज॑मि॒ति प्र – यु॒जम् । स्वाहा॑ । वा॒चः । वि॒धृ॑ति॒मि॒ति वि-धृ॑तिम् ।
अ॒ग्निम् । प्र॒युज॑मि॒ति प्र – यु॒जम् । स्वाहा॑ । प्र॒जाप॑तय इति
प्र॒जा – प॒तये॑ । म॒नवे॑ । स्वाहा॑ । अ॒ग्नये॑ । वै॒श्वान॑रा॒य । स्वाहा॑ ।
वि॒श्वे । दे॒वस्य॑ । ने॒तुः । म॒र्तः । वृ॒णीत॑ । स॒ख्यम् । वि॒श्वे । रा॒यः ।
इ॒षुद्ध्य॑सि । द्यु॒म्नम् । वृ॒णीत॑ । पु॒ष्यसे॑ । स्वाहा॑ । मा । स्वि॒ति ।
भि॒त्थाः । मा । स्वि॒ति । रि॒षः । दृ॒ह॒स्व । वी॒डय॑स्व । सु ॥
अ॒ंब । धृ॒ष्णु । वी॒रय॑स्व । 35 (50)

TS 4.1.9.2

– अग्निश्चेदं करिष्यथः ॥

दृ॒ह॒स्व दे॒वि पृ॒थि॒वि स्व॒स्तय॑ आ॒सु॒री मा॒या स्व॒धया॑ कृ॒ताऽसि॑ ।

जुष्टं॑ दे॒वाना॑मिदमस्तु ह॒व्यम॑रि॒ष्टा त्वमु॑दिहि य॒ज्ञे अ॒स्मिन् ॥

मि॒त्रैता॑मु॒खां तपै॑षा मा भेदि ।

ए॒तां ते परि॑ द॒दाम्य॑भित्त्यै ॥

द्र॒व॒न्नः सर्पि॑रा॒सुतिः॑ प्र॒त्नो हो॒ता वरे॑ण्यः ।

सह॑स॒स्पु॒त्रो अद्भु॑तः ॥

पर॑स्या॒ अधि॑ सँवतोऽवरा॑ अ॒भ्या – [] 36

TS 4.1.9.2 - Padam

अ॒ग्निः । च । इ॒दम् । क॒रिष्य॑थः ॥ दृ॒ह॒स्व । दे॒वि । पृ॒थि॒वि ।

स्व॒स्तयै॑ ॥ आ॒सु॒री । मा॒या । स्व॒धये॑ति स्व – धया॑ । कृ॒ता । अ॒सि ॥

जुष्ट॑म् । दे॒वाना॑म् । इ॒दम् । अ॒स्तु । ह॒व्यम् । अ॒रि॒ष्टा । त्वम् ।

उ॒दि॒ति । इ॒हि । य॒ज्ञे । अ॒स्मिन् ॥ मि॒त्र । ए॒ताम् । उ॒खाम् । तप॑ ।

ए॒षा । मा । भे॒दि ॥ ए॒ताम् । ते । प॒रीति॑ । द॒दामि॑ । अ॒भि॒त्त्यै ॥

द्र॒व॒न्न इति॑ द्रु – अ॒न्नः । सर्पि॑रा॒सुति॑रिति सर्पिः – आ॒सु॒तिः ।

प्र॒त्नः । हो॒ता । वरे॑ण्यः ॥ स॒हसः । पु॒त्रः । अद्भु॑तः ॥ पर॒स्याः ।
अ॒धी॒ति । सँ॒व॒त इति॑ सं – व॒तः । अ॒व॒रा॒न् । अ॒भि । ए॒ति । 36 (50)

TS 4.1.9.3

तर ।

य॒त्रा॒ह॒म॒स्मि॒ ताँ॒ अ॒व ॥
पर॒म॒स्याः॑ परा॒व॒तो रो॒हि॒दश्च॑ इ॒हाऽऽ ग॒हि ।
पु॒री॒ष्यः॑ पु॒रु॒प्रि॒योऽग्ने॑ त्वं त॒रा मृ॑धः ॥
सी॒द त्वं॑ मा॒तु॒र॒स्या उ॒प॒स्थे वि॒श्वान्य॑ग्ने व॒यु॒ना॒नि वि॒द्वान् ।
मै॒ना॒म॒र्चि॒षा मा॑ त॒प॒साऽभि॑ शू॒शु॒चोऽन्त॑र॒स्याँ शु॒क्र॒ज्यो॒तिर्वि॑ भा॒हि ॥
अ॒न्त॒र॒ग्ने रु॒चा त्व॑मु॒खायै॑ स॒द॒ने स्वे ।
त॒स्या॒स्त्वँ॑ ह॒र॒सा त॒प॒न् () जा॑त॒वे॒दः शि॒वो भ॑व ॥
शि॒वो भू॒त्वा म॒ह्य॒म॒ग्नेऽथो॑ सी॒द शि॒व॒स्त्वं ।
शि॒वाः कृ॒त्वा दि॒शः स॒र्वाः स्वां॑ यो॒नि॒मि॒हाऽऽ *स॑दः ॥ 37

TS 4.1.9.3 - Padam

तर॥ यत्र॑ । अ॒हम् । अ॒स्मि॑ । तान् । अ॒व ॥ पर॑म॒स्याः॑ । परा॑व॒त इति॑
परा॑ – व॒तः । रो॒हि॒दश्च॑ इति॑ रो॒हि॒त् – अ॒श्वः॑ । इ॒ह । ए॒ति । ग॒हि ॥
पु॒री॒ष्यः॑ । पु॒रु॒प्रि॒य इति॑ पु॒रु – प्रि॒यः॑ । अ॒ग्ने॑ । त्वम् । तर॑ । मृ॒धः ॥
सी॒द । त्वम् । मा॒तुः॑ । अ॒स्याः॑ । उ॒प॒स्थ इत्यु॒प – स्थे॑ । वि॒श्वानि॑ ।
अ॒ग्ने॑ । व॒यु॒नानि॑ । वि॒द्वान् ॥ मा । ए॒नाम् । अ॒र्चि॒षा॑ । मा । तप॑सा ।
अ॒भी॒ति॑ । शू॒शु॒चः॑ । अ॒न्तः॑ । अ॒स्याम् । शु॒क्र॒ज्यो॒ति॒रिति॑
शु॒क्र – ज्यो॒तिः॑ । वी॒ति॑ । भा॒हि ॥ अ॒न्तः॑ । अ॒ग्ने॑ । रु॒चा । त्वम् ।
उ॒खा॒यै॑ । स॒द॒ने॑ । स्वे ॥ त॒स्याः॑ । त्वम् । ह॒र॒सा । तप॑न् () ।
जा॒त॒वे॒द इति॑ जा॒त॒वे॒दः॑ । शि॒वः॑ । भ॒व ॥ शि॒वः॑ । भू॒त्वा । म॒ह्यम् ॥
अ॒ग्ने॑ । अ॒थो इति॑ । सी॒द । शि॒वः॑ । त्वम् ॥ शि॒वाः॑ । कृ॒त्वा ।
दि॒शः॑ । सर्वाः॑ । स्वा॒म् । यो॒नि॒म् । इ॒ह । ए॒ति॑ । अ॒स॒दः॑ ॥ 37 (70)

(वी॒र॒य॒स्वा – [SS] – तप॑न् – वि॒श्व॒ति॒श्च॑) (A9)

TS 4.1.10.1

यद॒ग्ने॑ या॒नि का॒नि चाऽऽ॒ते दा॒रू॒णि द॒ध्म॒सि॑ ।
तद॒स्तु॑ तु॒भ्य॒मि॒द् घृ॒तं तज्जु॑षस्व यवि॒ष्ट्य ॥

यद॒त्यु॒प॒जि॒ह्वि॒का॒ यद्-व॒म्रो अ॒ति॒स॒र्प॒ति॒ ।

सर्वं॑ तद॒स्तु ते॒ घृ॒तं तज्जु॒षस्व॒ यवि॒ष्ट्य ॥

रा॒त्रिर्-रा॒त्रि-म॒प्र॒या॒वं भ॒रन्तोऽश्वा॑ये॒व ति॒ष्ठते॑ घा॒स॒म॒स्मै ।

रा॒य॒स्पोषे॑ण॒ समि॒षा म॒द॒न्तोऽग्ने॒ मा ते॒ प्र॒ति॒वेशा॑ रिषाम ॥

ना॒भा - [] 38

TS 4.1.10.1 - Padam

यत् । अ॒ग्ने । या॒नि । का॒नि । च॒ । ए॒ति॒ । ते॒ । दा॒रू॒णि । द॒ध्म॒सि॑ ॥

तत् । अ॒स्तु॒ । तु॒भ्यम्॑ । इत् । घृ॒तम् । तत् । जु॒षस्व॒ । यवि॒ष्ट्य ॥

यत् । अ॒त्ति॒ । उ॒प॒जि॒ह्वि॒केत्यु॑प - जि॒ह्वि॒का । यत् । व॒म्रः ।

अ॒ति॒स॒र्प॒तीत्य॑ति-स॒र्प॒ति ॥ सर्व॑म् । तत् । अ॒स्तु॒ । ते॒ । घृ॒तम् । तत् ।

जु॒षस्व॒ । यवि॒ष्ट्य ॥ रा॒त्रिर्-रा॒त्रि॒मि॒ति॒ रा॒त्रिम् - रा॒त्रिम् ।

अ॒प्र॒या॒व॒मि॒त्यप्र॑-या॒वम् । भ॒रन्तः॑ । अ॒श्वा॒य । इ॒व । ति॒ष्ठते॑ । घा॒स॒म् ।

अ॒स्मै ॥ रा॒यः । पो॒षे॒ण । स॒मि॒ति॒ । इ॒षा । म॒द॒न्तः॑ । अ॒ग्ने॑ । मा । ते॒ ।

प्र॒ति॒वेशा॑ इति॒ प्र॒ति - वे॒शाः । रि॒षाम॑ ॥ ना॒भा । 38 (50)

TS 4.1.10.2

पृ॒थि॒व्याः॑ स॒मि॒धा-॑ न॒म॒ग्नि॒ꣳ रा॒य॒स्पोषा॑य बृ॒ह॒ते॑ ह॒वाम॑हे ।
इ॒र॒म॒म॒दं॑ बृ॒ह॒दु॒क्थं॑ यँ॒ज॒त्रं॑ जे॒तार॑म॒ग्निं॑ पृ॒त॒ना॒सु सा॒स॒हिं ॥
याः॑ से॒ना॒ अ॒भी॒त्व॒री-॑ रा॒व्या॒धि॒नी-॑ रु॒गणा॑ उ॒त ।
ये स्ते॒ना ये च॑ त॒स्करा॑स्ताꣳस्ते अ॒ग्नेऽपि॑ द॒धाम्या॑स्यै ॥
दꣳष्ट्रा॑भ्यां म॒लि॒म्लून् जं॒भ्यै-॑ स्त॒स्करा॑ꣳ उ॒त ।
ह॒नू॒भ्याꣳ स्ते॒नान् भ॑गव॒स्ताꣳ स्त्वं॑ खा॒द सु॒खादि॑तान् ॥
ये जने॑षु म॒लि॒म्लवः॑ स्ते॒नास॑-स्त॒स्करा॑ वने॑ ।

ये - [] 39

TS 4.1.10.2 - Padam

पृ॒थि॒व्याः । स॒मि॒धा॒न॒मि॒ति॑ सं-इ॒धा॒न॒म् । अ॒ग्नि॒म् । रा॒यः ।
पोषा॑य । बृ॒ह॒ते॑ । ह॒वाम॑हे ॥ इ॒र॒म॒द॒मि॒ती॒रं - म॒द॒म् । बृ॒ह॒दु॒क्थ॒मि॒ति॑
बृ॒ह॒त् - उ॒क्थ॒म् । य॒ज॒त्र॒म् । जे॒तार॑म् । अ॒ग्नि॒म् । पृ॒त॒ना॒सु ।
सा॒स॒हि॒म् ॥ याः॑ । से॒नाः॑ । अ॒भी॒त्व॒री॒रि॒त्य॒भि - इ॒त्व॒रीः॑ ।
आ॒व्या॒धि॒नी॒रि॒त्या - व्या॒धि॒नीः॑ । उ॒गणाः॑ । उ॒त ॥ ये । स्ते॒नाः॑ । ये ।
च । त॒स्कराः॑ । ता॒न् । ते । अ॒ग्ने । अ॒पी॒ति॑ । द॒धामि॑ । आ॒स्यै॑ ॥

द॒ष्ट्राभ्या॑म् । म॒लि॒म्लून् । जं॒भ्यैः । तस्करा॑न् । उ॒त ॥ ह॒नूभ्या॑मि॒ति
ह॒नु – भ्या॑म् । स्ते॒नान् । भ॒गव॑ इति॒ भग॑ – वः । तान् । त्वम् ।
खा॒द । सु॒खादि॑तानि॒ति सु॑ – खा॒दि॒तान् ॥ ये । जने॑षु । म॒लि॒म्लवः॑ ।
स्ते॒नासः॑ । तस्कराः॑ । वने॑ ॥ ये । 39 (50)

TS 4.1.10.3

कक्षे॑ष्व॒घाय॑व स्ता॒ ऽ स्ते॑ द॒धामि॑ जं॒भयोः॑ ॥
यो अ॒स्मभ्य॑मरातीयाद्-यश्च॑ नो॒ द्वेष॑ते ज॒नः ।
निन्दा॑द्-यो अ॒स्मान् दि॒प्साच्च॑ सर्वं॒ तं म॑स्मसा कुरु ॥
सञ्शितं॑ मे ब्रह्म॒ सञ्शितं॑ वी॒र्यं॑ बलं॑ ।
सञ्शितं॑ क्षत्रं॒ जिष्णु॑ यस्या॒ऽहमस्मि॑ पु॒रोहि॑तः ॥
उदे॑षां बा॒हू अति॑रमु॒द्वर्च॑ उ॒दू बलं॑ ।
क्षि॒णोमि॑ ब्रह्म॒णा ऽमि॑त्रानु॒न्नयामि॑ – [] 40

TS 4.1.10.3 - Padam

कक्षे॑षु । अ॒घाय॑व इत्य॒घ – यवः॑ । तान् । ते । द॒धामि॑ । जं॒भयोः॑ ॥
यः । अ॒स्मभ्य॑मि॒त्यस्म॑-भ्यम् । अ॒राती॑यात् । यः । च । नः । द्वेष॑ते ।

जनः ॥ निन्दात् । यः । अस्मान् । दिप्सात् । च । सर्वम् । तम् ।
मस्मसा । कुरु ॥ सञ्शितमिति सं – शितम् । मे । ब्रह्म ।
सञ्शितमिति सं – शितम् । वीर्यम् । बलम् ॥
सञ्शितमिति सं – शितम् । क्षत्रम् । जिष्णु । यस्य । अहम् ।
अस्मि । पुरोहित इति पुरः – हितः ॥ उदिति । एषाम् । बाहू इति ।
अतिरम् । उदिति । वर्चः । उदिति । उ । बलम् ॥ क्षिणोमि ।
ब्रह्मणा । अमित्रान् । उदिति । नयामि । 40 (50)

TS 4.1.10.4

स्वाञ् अहं ॥

दृशानो रुक्म उर्व्या व्यद्यौर्दुर्मर्षमायुः श्रिये रुचानः ।
अग्निरमृतो अभवद्वयो-भिर्यदेनं द्यौरजनयथ् सुरेताः ॥
विश्वा रूपाणि प्रति मुञ्चते कविः प्राऽसावीद्भद्रं द्विपदे चतुष्पदे ।
वि नाकमख्यथ् सविता वरेण्योऽनु प्रयाणमुषसो वि राजति ॥
नक्तोषासा समनसा विरूपे धापयेते शिशुमेकञ् समीची ।
द्यावा क्षामा रुक्मो – [] 41

TS 4.1.10.4 - Padam

स्वान् । अ॒हम् ॥ दृ॒शानः॑ । रु॒क्मः॑ । उ॒र्व्या । वी॒ति॑ । अ॒द्यौत् ।
दु॒र्मर्ष॑मि॒ति दुः॑ – म॒र्षम् । आ॒युः॑ । श्रि॒ये । रु॒चानः॑ ॥ अ॒ग्निः ।
अ॒मृतः॑ । अ॒भवत् । वयो॑भि॒रिति॑ वयः॑ – भिः॑ । यत् । ए॒नम् । द्यौः॑ ।
अ॒जन॑यत् । सु॒रेता॑ इति॑ सु – रेताः॑ ॥ वि॒श्वा । रू॒पाणि॑ । प्र॒तीति॑ ।
मु॒ञ्च॑ते । क॒विः॑ । प्रेति॑ । अ॒सावीत् । भ॒द्रम् । द्वि॒पद॑ इति॑ द्वि॒पदे॑ ॥
चतु॑ष्पद॒ इति॑ चतुः॑ – प॒दे ॥ वी॒ति॑ । ना॒कम् । अ॒ख्यत् । स॒विता॑ ।
वरे॑ण्यः । अ॒न्विति॑ । प्र॒याण॑मि॒ति प्र॑ – या॒नम् । उ॒षसः॑ । वी॒ति॑ ।
रा॒ज॒ति ॥ न॒क्तोषा॑सा ॥ स॒मन॑सेति॑ स – म॒नसा॑ । वि॒रूपे॑ इति॑
वि॒रूपे॑ । धा॒पये॑ते इति॑ । शि॒शुम् । ए॒कम् । स॒मीची॑ इति॑ ॥ द्या॒वा ॥
क्षाम॑ । रु॒क्मः॑ । 41 (50)

TS 4.1.10.5

अ॒न्तर्वि॑ भाति॑ दे॒वा अ॒ग्निं धा॑रयन् द्र॒वि॒णोदाः॑ ॥
सु॒प॒र्णो॑ऽसि ग॒रुत्मा॑न् त्रि॒वृत्ते॑ शिरो॑ गाय॒त्रं चक्षुः॑ स्तोम॑ आ॒त्मा
सा॒म ते त॒नूर्वा॑मदे॒व्यं बृ॒हद् रथ॑न्त॒रे प॒क्षौ य॑ज्ञाय॒ज्ञियं॑ पु॒च्छं

छन्दा॑स्य॒ङ्गानि॑ धि॒ष्णि॒याः श॒फा यजू॑षि॒ नाम ॥

सु॒पर्णो॑ऽसि ग॒रु॒त्मा॒न् दि॒वं गच्छ॑ सु॒वः प॒त ॥ 42

TS 4.1.10.5 - Padam

अ॒न्तः । वी॒ति । भा॒ति । दे॒वाः । अ॒ग्नि॒म् । धा॒र॒य॒न् । द्र॒वि॒णो॒दा
इति॑ द्र॒वि॒णः – दाः ॥ सु॒पर्ण॑ इति॑ सु – पर्णः॑ । अ॒सि । ग॒रु॒त्मा॒न् ।
त्रि॒वृ॒दि॒ति त्रि – वृ॒त् । ते । शि॒रः । गा॒य॒त्र॒म् । चक्षुः॑ । स्तो॒मः ।
आ॒त्मा । सा॒म । ते । त॒नूः । वा॒म॒दे॒व्य॒मि॒ति वा॒म – दे॒व्य॒म् ।
बृ॒ह॒द्र॒थ॒न्त॒रे इति॑ बृ॒ह॒त् – र॒थ॒न्त॒रे । पक्षौ॑ । य॒ज्ञा॒य॒ज्ञि॒य॒म् । पु॒च्छ॒म् ॥
छन्दा॑सि । अ॒ङ्गानि॑ । धि॒ष्णि॒याः । श॒फाः । यजू॑षि । ना॒म ॥
सु॒पर्ण॑ इति॑ सु – पर्णः॑ । अ॒सि । ग॒रु॒त्मा॒न् । दि॒व॒म् । गच्छ॑ ।
सु॒वः । प॒त ॥ 42 (38) (ना॒भा – व॒ने ये – न॒यामि॑ – क्षा॒मा रु॒क्मा॑

– ऽष्टा॒त्रिं॒शच्च॑) (A10)

TS 4.1.11.1

अ॒ग्ने यं य॒ज्ञ॒म॒ध्व॒रं वि॒श्व॒तः परि॒भूर॑सि ।

स इ॒द्दे॒वेषु॑ गच्छति ॥

सो॒म या॒स्ते म॒यो॒भुव॑ ऊ॒त॒यः स॒न्ति दा॒शुषे॑ ॥

ताभि॑र्नो ऽवि॒ता भव॑ ॥

अ॒ग्नि॒र्मूर्ध्ना॑ भुवः॑ ॥

त्वन्नः॑ सोम॒ या ते॑ धामा॒नि ॥

तथ् स॒वि॒तुर्वरे॑ण्यं॒ भर्गो॑ दे॒वस्य॑ धीमहि॑ ।

धियो॑ यो नः प्रचो॒दयात्॑ ॥

अचि॑त्ती यच्च॑कृ॒मा दै॒व्ये जने॑ दी॒नैर्दक्षैः॑ प्रभू॑ती पू॒रुष॒त्वता॑ ॥ 43

TS 4.1.11.1 - Padam

अ॒ग्ने॑ । यम् । य॒ज्ञम् । अ॒ध्व॒रम् । वि॒श्वतः॑ । प॒रिभू॑रिति॒ परि – भूः ।

अ॒सि॑ ॥ सः । इत् । दे॒वेषु॑ । ग॒च्छ॒ति ॥ सोम॑ । याः । ते । म॒योभु॒व

इति॑ मयः – भुवः॑ । ऊ॒तयः॑ । स॒न्ति । दा॒शुषे॑ ॥ ताभिः॑ । नः ।

अ॒वि॒ता । भव॑ ॥ अ॒ग्निः । मूर्ध्ना॑ । भुवः॑ ॥ त्वम् । नः । सोम॑ ।

या । ते । धामा॒नि ॥ तत् । स॒वि॒तुः । वरे॑ण्यम् । भर्गः॑ । दे॒वस्य॑ ।

धीम॑हि ॥ धि॒यः । यः । नः । प्रचो॒दया॒दिति॑ प्र-चो॒दयात्॑ ॥ अचि॑त्ती ।

यत् । च॒कृ॒म । दै॒व्ये॑ । जने॑ । दी॒नैः । दक्षैः॑ । प्रभू॑तीति॒ प्र – भू॒ती ।

पू॒रुष॒त्वते॑ति॒ पू॒रुष – त्वता॑ ॥ 43 (50)

TS 4.1.11.2

दे॒वेषु॑ च स॒वि॒त॒र्मा॒नु॒षेषु॑ च त्वम् नो अ॒त्र सु॒व॒ता॒द॒ना॒ग॒सः॑ ॥
चो॒द॒यि॒त्री॒ सू॒नृ॒ता॒नां॑ चे॒त॒न्ती॑ सु॒म॒ती॒नां॑ ।
य॒ज्ञं द॒धे॑ सर॒स्व॒ती ॥
पा॒वी॒र॒वी क॒न्या॑ चि॒त्रा॒युः॑ सर॒स्व॒ती वी॒र॒प॒त्नी॑ धि॒यं धा॑त् ।
ग॒ना॒भि॒र॒च्छि॒द्रं॑ श॒रणं॑ स॒जोषा॑ दु॒रा॒ध॒र्षं॑ गृ॒ण॒ते श॒र्म य॑स॒त् ॥
पू॒षा गा अ॒न्वे॑तु नः पू॒षा र॒क्ष॒त्व॒र्व॒तः॑ ।
पू॒षा वा॒जं स॒नो॑तु नः ॥
शु॒क्रं ते अ॒न्य॒द्य॒ज॒तं ते अ॒न्यद् - [] 44

TS 4.1.11.2 - Padam

दे॒वेषु॑ । च । स॒वि॒तः॑ । मा॒नु॒षेषु॑ । च । त्वम् । नः । अ॒त्र । सु॒व॒ता॒त् ।
अ॒ना॒ग॒सः॑ ॥ चो॒द॒यि॒त्री॒ । सू॒नृ॒ता॒नाम् । चे॒त॒न्ती॑ । सु॒म॒ती॒ना॒मि॒ति॑
सु - म॒ती॒नाम् ॥ य॒ज्ञम् । द॒धे॑ । सर॒स्व॒ती ॥ पा॒वी॒र॒वी । क॒न्या॑ ।
चि॒त्रा॒यु॒रि॒ति॑ चि॒त्र - आ॒युः॑ । सर॒स्व॒ती । वी॒र॒प॒त्नी॑ति॑ वी॒र - प॒त्नी॑ ।
धि॒यम् । धा॑त् ॥ ग॒ना॒भिः॑ । अ॒च्छि॒द्रम् । श॒रणम् ।

स॒जोषा॑ इति॑ स-जोषाः॑ । दु॒राध॑र्षमि॒ति दुः॑ – आ॒धर्ष॑म् । गृ॒णते॑ ।
श॒र्म । य॒ञ्स॑त् ॥ पू॒षा । गाः॑ । अ॒न्वि॒ति । ए॒तु । नः॑ । पू॒षा । र॒क्षतु॑ ।
अ॒र्वतः॑ ॥ पू॒षा । वा॒जम् । स॒नो॒तु । नः॑ ॥ शु॒क्रम् । ते॑ । अ॒न्यत् ।

य॒जत॑म् । ते॑ । अ॒न्यत् । 44 (50)

TS 4.1.11.3

वि॒षु॒रूपे॑ अ॒हनी॑ द्यौ॒रि॒वासि॑ ।

वि॒श्वा हि॑ मा॒या अ॒वसि॑ स्व॒धावो॑ भ॒द्रा ते॑ पू॒षन्नि॒ह रा॒तिर॑स्तु ॥

ते॒ऽव॒र्द्धन्त॑ स्व॒तव॑सो म॒हित्व॒ना ऽऽ ना॒कं त॒स्थुरु॒रु च॑क्रि॒रे स॒दः ।

वि॒ष्णुर्य॒द्वाऽऽव॑द्-वृ॒षणं॑ म॒दच्यु॑तं व॒यो न॑ सी॒दन्न॑धि ब॒र्हिषि॑ प्रि॒ये ॥

प्र चि॒त्रम॑र्कं गृ॒णते॑ तु॒राय॑ मा॒रुता॑य स्व॒तव॑से भ॒रद्ध्वं॑ ।

ये सहा॑ञ्सि॒ सह॑सा॒ सह॑न्ते – [] 45

TS 4.1.11.3 - Padam

वि॒षु॒रूपे॑ इति॑ वि॒षु – रू॒पे । अ॒हनी॑ इति॑ । द्यौः॑ । इ॒व । अ॒सि ॥

वि॒श्वाः॑ । हि॑ । मा॒याः॑ । अ॒वसि॑ । स्व॒धाव॑ इति॑ स्व॒धा – वः॑ । भ॒द्रा ।

ते । पू॒षन् । इ॒ह । रा॒तिः । अ॒स्तु ॥ ते । अ॒वर्द्ध॑न्त । स्व॒तव॑स इति
स्व – तव॑सः । म॒हि॒त्व॒नेति॑ म॒हि – त्व॒ना । ए॒ति । ना॒कम् । त॒स्थुः ।
उ॒रु । च॒क्रि॒रे । स॒दः ॥ वि॒ष्णुः । यत् । ह । आ॒वत् । वृ॒षण॑म् ।
म॒द॒च्यु॒तमि॑ति म॒द – च्यु॑तम् । व॒यः । न । सी॒दन् । अधी॑ति ।
ब॒र्हि॒षि । प्रि॒ये ॥ प्रे॑ति । चि॒त्रम् । अ॒र्कम् । गृ॒ण॒ते । तु॒राय॑ ।
मा॒रु॒ताय॑ । स्व॒तव॑स इति स्व – तव॑से । भ॒र॒द्ध्वम् ॥
ये । स॒हा॒सि॑ । स॒ह॒सा । स॒ह॒न्ते । 45 (50)

TS 4.1.11.4

रे॒ज॒ते अ॒ग्ने पृ॒थि॒वी म॒खेभ्यः॑ ॥
वि॒श्वे दे॒वा वि॒श्वे दे॒वाः ॥
द्या॒वा नः॑ पृ॒थि॒वी इ॒मं सि॒द्ध॒मद्य॑ दि॒वि॒स्पृ॒शं ॥
य॒ज्ञं दे॒वेषु॑ य॒च्छ॒तां ॥
प्र॒ पूर्॒व॒जे पि॒तरा॑ न॒व्यसी॑भिर्गी॒र्भिः कृ॑णु॒ध्वं स॒दने॑ ऋ॒तस्य॑ ।
आ नो॑ द्या॒वापृ॒थि॒वी दै॒व्येन॑ ज॒नेन॑ या॒तं म॒हि वां व॑रू॒थं ॥
अ॒ग्निं स्तो॑मे॒न बो॑ध॒य स॒मि॒धानो॑ अ॒मर्त्यं॑ ।

ह॒व्या दे॒वेषु॑ नो दधत् ॥

स ह॒व्यवा॒डम॑र्त्य उ॒शिग्दू॑तश्चनो॒हितः॑ () ।

अ॒ग्निर्द्वि॒या स॑मृ॒ण्वति॑ ॥

श॒म् नो॑ भवन्तु वा॒जेवा॑जे ॥ 46

TS 4.1.11.4 - Padam

रे॒ज॒ते । अ॒ग्ने । पृ॒थि॒वी । म॒खेभ्यः॑ ॥ वि॒श्वे॑ । दे॒वाः । वि॒श्वे॑ । दे॒वाः ॥

द्या॒वा॑ । नः॑ । पृ॒थि॒वी इति॑ । इ॒मम् । सि॒द्धम् । अ॒द्य ।

दि॒वि॒स्पृ॒शमि॑ति दि॒वि – स्पृ॒शम् ॥ य॒ज्ञम् । दे॒वेषु॑ । य॒च्छ॒ताम् ॥

प्रेति॑ । पू॒र्व॒जे इति॑ पू॒र्व-जे॑ । पि॒तरा॑ । न॒व्यसी॑भिः । गी॒र्भिः ।

कृ॒णु॒ध्वम् । स॒द॒ने इति॑ । ऋ॒तस्य॑ ॥ ए॒ति । नः॑ । द्या॒वापृ॒थि॒वी इति॑

द्या॒वा-पृ॒थि॒वी । दै॒व्येन॑ । ज॒नेन॑ । या॒तम् । म॒हि । वा॒म् । व॒रूथ॑म् ॥

अ॒ग्निम् । स्तो॒मेन॑ । बो॒धय॑ । स॒मि॒धा॒न इति॑ सं – इ॒धा॒नः ।

अ॒म॒र्त्यम् ॥ ह॒व्या । दे॒वेषु॑ । नः॑ । दध॑त् ॥ सः॑ । ह॒व्यवा॒डिति॑

ह॒व्य – वाट् । अ॒म॒र्त्यः । उ॒शिक् । दू॒तः । च॒नो॒हितः॑ () ॥ अ॒ग्निः ।

धिया॑ । समि॑ति । ऋ॒ण्व॒ति ॥ श॒म् । नः॑ । भ॒वन्तु॑ ।

वा॒जे॑वा॒ज इति॑ वा॒जे – वा॒जे ॥ 46 (58)

(पू॒रुष॑त्वता॑ – य॒ज॒त॒न्ते॑ अ॒न्यथ् – स॒ह॒न्ते॑ – च॒नो॑हि॒तो – ऽष्टौ॑ च॑)
(A11)

पद पाठे (वाक्य सहित) – चतुर्थकाण्डे – प्रथमः प्रश्नः

PraSna Korvai with starting Padams of 1 to 11 Anuvaakams :-

(यु॒ञ्जान॑ – इ॒माम॑गृ॒भ्णन् – दे॒वस्य॑ – सन्ते॑ – वि पाज॑सा –
वस॑वस्त्वा – समा॑ – स्त्वो॒र्द्ध्वा – अ॒स्याकू॑तिं – यँद॑ग्ने या–
न्यग्ने॑ यं यँ॒ज्ञ – मे॒काद॑श)

Korvai with starting Padams of 1, 11, 21 Series of Panchaatis :-

(यु॒ञ्जानो॑ – वर्म॑ च स्थ – आ॒दि॒त्यास्त्वा – भा॒रती॑ – स्वा॒ङ्
अ॒ह॒ङ् – षट्च॑त्वारि॒ंशत्)

First and Last Padam of First Prasnam of Kandam 4 :-

(यु॒ञ्जानो॑ – वा॒जेवा॑जे)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पद पाठे

चतुर्थ काण्डे प्रथमः प्रश्नः समाप्तः ॥

पद पाठे (वाक्य सहित) – चतुर्थकाण्डे – प्रथमः प्रश्नः

Details of Panchati and Padam for Kandam 4 , Prasanam 1 – (TS 4.1)

	Panchati	Padams
Anuvakam 1	4	203
Anuvakam 2	5	270
Anuvakam 3	4	177
Anuvakam 4	4	186
Anuvakam 5	4	204
Anuvakam 6	3	169
Anuvakam 7	4	184
Anuvakam 8	6	284
Anuvakam 9	3	170
Anuvakam 10	5	238
Anuvakam 11	4	208
Total →	46	2293

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in